


東林書院志 十一之三

|     |   |   |   |
|-----|---|---|---|
| 漢書門 |   |   |   |
| 九   | 三 | 六 |   |
| 一   | 九 | 六 |   |
| 八   | 二 | 九 |   |
| 冊   | 架 | 函 | 號 |

|      |   |   |
|------|---|---|
| 內閣文庫 |   |   |
| 九    | 三 | 六 |
| 一    | 九 | 六 |
| 八    | 二 | 九 |
| 架    | 冊 | 號 |
| 漢書   |   |   |

|      |         |
|------|---------|
| 內閣文庫 |         |
| 番號   | 漢 9136  |
| 冊數   | 8 ( 5 ) |
| 函號   | 292 40  |

五







東林書院志卷之十一

列傳五

鄒經畬先生傳

錢肅潤

先生姓鄒名期字公寧無錫人性至孝讀書攻苦年三十始爲  
 諸生屢舉不售經年矻矻揣摩制義偶於羣書中得王文成集  
 言及靜坐先生曰調息亦頗有益高公曰不屑也先生聞之慄然  
 又一日問操存法高公曰平日功夫何如先生曰好看書高公曰  
 此處正好用功乃從先儒操存諸法遍參之最後獨心旨高公所  
 論觀未發功夫一觀而用寂一語大率謂觀未發之學以主靜爲  
 訣以主敬爲宗以禮經之九容爲把柄九容件件停當身心內外



東林書院志卷之十一 鄒傳



東林書院志 卷之二  
一齊收斂則終日研求經義亦是栽培本體之助至此始悟看書  
靜坐原非兩截無事時他念不生非復往來憧憧之擾臨事因而  
應之主張自在不至錯亂此真學問得力後証尋語也先生嘗云  
聖賢下語如化工肖物一字不虛故其說書最解人頤弟子日益  
以進當其棲息玄宮問字屢滿斗室不能容復他徙徙之後又不  
能容乃就文昌閣下闢軒二架以居之度可容百五六十人如是  
者歲率以為常特著為文行社約三章以繩束之諸負挾邪僻者  
匿影去自是春秋二榜科必有人金門玉堂聯鑣並進壇玷之盛  
前此未有後因吳君觀華於東林廢址建麗澤堂為之左右提倡  
每歲聚學者說書堂中風雨寒暑無愆期故講席得以不墮其造  
就後學如此平生實心學問尤留心於經濟嘗纂皇明洪範經世  
要語及名臣言行錄並鑿鑿可著廊廟為人嚴氣正性雖身列章

縫而心憂社稷天啟間三案議起不勝憤激長歌短咏以鳴不平  
題曰委巷謠崇禎初政事一新有擬請復東林疏弭亂臆言救荒  
末議固人心論活井田說皆一時石畫惜未有推而行之者御史  
祈公彪佳巡按吳中式其廬不見題扁額曰理學真儒後舉賢良  
方正復不出安貧樂道雖餽粥不繼日惟玩易一二卦或編緝見  
聞一兩行以當渴飲飢食而已壬午卒年七十六學者稱經畚先  
生門人嚴毅等謚曰懿長先生



至門人選其善者曰... 鄒忠餘先生傳... 公聞濂洛關閩之學其學以無欲為宗慎獨為要邑人稱二鄒夫子云先生弱冠郡縣試皆第一與懿長公同補博士弟子員嘗讀書湖濱瘞巨人骨夜夢緋衣人謝曰願有以報公天啟辛酉中副車需次將貢崇禎丙子奉旨在京三品以上及科道官舉賢良方正一人補州縣正缺先生以同邑浙江道監察御史張公纘曾薦舍一二楹聚土人講鄉約立記善惡簿人知嚮化兩廣制臺張公憐君才賢委署養利武緣所至稱仁廉庚辰升浙江都司經歷攝雲和縣事有東陽縣生員許然率其徒數百人來雲和先生怪然踪跡用好言遣之然去日然兄許都反金華報至先生戒城守夜

鄒忠餘先生傳

鄒 陞

先生諱期相字公寅號忠餘吾祖懿長公諱期楨胞弟也與懿長公聞濂洛關閩之學其學以無欲為宗慎獨為要邑人稱二鄒夫子云先生弱冠郡縣試皆第一與懿長公同補博士弟子員嘗讀書湖濱瘞巨人骨夜夢緋衣人謝曰願有以報公天啟辛酉中副車需次將貢崇禎丙子奉旨在京三品以上及科道官舉賢良方正一人補州縣正缺先生以同邑浙江道監察御史張公纘曾薦舍一二楹聚土人講鄉約立記善惡簿人知嚮化兩廣制臺張公憐君才賢委署養利武緣所至稱仁廉庚辰升浙江都司經歷攝雲和縣事有東陽縣生員許然率其徒數百人來雲和先生怪然踪跡用好言遣之然去日然兄許都反金華報至先生戒城守夜



秉燭肅衣冠獨坐廳事曰賊來願以身殉聞賊退乃罷其然之來雲和也將為都內應雲陽不至糜爛先生力也甲申聞國變掛冠歸寄居錫山睢陽廟傍僧舍每向人談及國事嗚咽流涕有哭國難詩二首有句云推胸欲報無由報空使孤臣血滿中有辨統詩和文信國正氣歌一首作詩後絕粒數日死時甲申八月二十日也享年七十先生未仕時設教洞虛宮弟子恒數百人與懿長公進主東林講席自號曰三勿居士

張秦巖先生傳

秦鏞

先生諱雲鸞字羽臣別號秦巖無錫人幼篤學湛於經術有聲黌序間久之以經師教授里中士出其門者甚衆顧先生之學其淑人者最優於講當其南面而施講幄所詮說與時師異考古証今精晰無遺學者羣疑滿腹衆論塞胸得其一言砉然立解迭起問難酬答精敏四座厭心聞者以為有橫渠擁臯比氣象故事直指文宗按部及邑令下車率詣文廟掣講學官必以先生應先期敦趨之至期歷階而升一揖就位容止肅然講畢傳會時政問及邑中利弊問問侃侃當事為之動容昔唐堯臣以上堂獻茶聽講得悟先生以言論風旨悚動上官賢於堯臣遠矣邑龜山祠春秋會講顧端文高忠憲兩先生狎主齊盟遠近四集先生儼然就座宣明聖學危言微論令人汗下又不減象山白鹿一會聽者揮扇時



也蓋先生之學得之心而述之口者如此甲寅乙卯間楚黃陳公以聞爲邑令知先生最深每試必首顧弗利場屋爲諸生祭酒有年乃嘆曰吾不以所學獻當寧施行之乃顧數數提耳無庸也於是發憤著爲經正錄一書庚午秋覽覽走三千里獻闕下尋奉旨下提學御史臣問狀果否言行允符學臣以賢良方正狀上聞遂特授明經之科以歸士論偉之嗟乎以先生所學如此不當如尹和靖朱晦庵爲崇政殿說書耶今之經筵講官卒無踰先生者其次則當造士臨雍備五更三老之位又其次則當如胡安定教授湖州卒以其科條施行天下凡此皆先生之所優爲者而區區以訓詁之學聞非所云也論者以爲先生在漢世當與鄭玄諸儒奪席數重夫先生固非爲康成之學者萬曆之季溫陵李氏之書盛行於時溫陵之學蓋本於文成龍溪先生著論以爲其說非是息

邪詎詖坐此輩耳故其書口經正而是時東林兩先生方闡明性善力闢無善與二王相牴牾先生之言實與東林相表裏夫其苦心衛道彰彰如是而或以爲訓詁而已者則已誣矣鏞少也蓋嘗執經侍先生云先生講論旣畢必及時政得失唏吁久之或聞朝廷用一正人行一正論則欣欣喜而相告雖其身不離於鄉校而盡思已宏遠矣先生於壁經爲頤門之學其於謨訓誓命之大尤盡心焉使其所施設得行於時當不令天下訾講學之儒爲無用也



黃日齋先生傳

張夏

黃廣原名伯英字冠龍南直無錫人先世常熟人建文朝忠臣叔  
楊公鉞之後避居錫西胡埭代有耆儒冠龍幼敏且恪隨父塾游  
涇里因登顧端文尚寶兩先生之門初命題中庸何爲而作也句  
千言立就端文奇之及長從於東林乙丑丙寅間書院毀璫焰熾  
日趨書院舊址講習不輟會忠憲赴止水有司欲繫其子旋奉旨  
寃漏洩因上臺責保狀急高氏四顧無應者慨然要華孝廉國才  
同署狀極陳罪不及孥之意獲免嘗奉部檄修神光熹三廟實錄  
綽有史法以貢除鎮江郡博合兩庠士訂三山社入我箴笏公天  
心書院擢令安遠甫任捐俸竣城工初邑有重囚董傳羅江譚應  
瑞鍾世修者讞碎候決忽流寇至斬獄釋囚脅之曰從行者賞否  
則誅董傳等數囚佯從之中塗給以家近挈妻子仍奔赴獄明年



寇再至數囚復請願出死力守城城得不潰當事者未有以請也至是部移適下數囚在決中爲力請於郵部曰囚罹法愚也不從賊志也守城功也謂罪必不可贖乎何以勸後郵部疏題得開釋其識時勢達經權類若此居二年卒於官

秦澹緣先生傳

錢肅潤

先生姓秦名重泰字原博別號澹緣無錫人尚書端敏公玄孫少好濂洛關閩之學萬曆庚子舉于鄉得山東鄆城教諭鄆當白蓮兵燹後黷序爲燬先生至僑寓民間怡然甘之榜一聯於座右云祿薄而君恩實厚毋自薄以負其厚位卑而師道宜尊毋自卑以褻其尊其志趣不苟如此居四年士子愛戴如安定先生在蘇湖時尊以臺司交薦遷福建長樂縣令長俗故多挾睚眦忿服毒草圖命者先生廉知之令鑿毒草地爲渠毒賴之風以息諸如黜奸胥懲豪棍平反疑獄禁斂公費嚴緝寇賊海之濱鯨波不作境內以安一邑士民建祠祀之性素不耐擎拳曲跽時適伏謁一上臺稍稍失度竟以此忤當事論調先生欣然束裝不少顧距莅任僅三百日時論以公之長樂眎八十日之彭澤令差多三之二云及



歸放懷詩酒杜跡城市縣舉賓筵不赴間共故令許公同坐放棹  
洞庭卜築乾元觀徜徉林壑者九年以崇禎丙子冬疾卒年六十  
五

陳並漁先生傳

高 隆

先生姓陳氏諱正卿字並漁無錫人父太常筠塘公東林之儒者  
也先生爲人敦孝讓飭廉隅有父風學亦如之中萬曆乙卯舉人  
屢上公車不第退而閉戶讀書深求理學之奧緣筠塘公與先忠  
憲公同登萬曆己丑進士素以道義相切劘先生亦嘗訪道於先  
忠憲與之語卽大有領會先忠憲甚器重先生亟稱之曰筠塘有  
子又從錢公啟新學易而易理以精其所交惟馬君常先生爲最  
深一言一動無不視儆性至介剛直不撓見有不宜鄉飲而以勢  
相射者必攻擊之見有未當銓除而以賄僥倖者必指摘之不通  
私牘於公門不樹聲援於貴戚邑之人莫不敬而畏之曰此真道  
學家風也先生家故貧瘠田數畝僅供饘粥時值飢饉指其困語  
家人曰吾欲出此以贍桑梓則苦不給欲自食之則不忍獨飽奈



何從此惟日噉三棗下以泉水遞減至一棗越八日卒先生既歿先生之次子禋祉以鞏幕叅軍於順治戊申之歲代本郡司馬捧檄疆理西禮伏三邑三邑地磽土瘠民不聊生爲繕文申請督撫具題詳豁荒糧六千五百石有奇以善繼先人之志詩云君子有孝子共先生之謂乎先生之崇祀道南也以禋祉成進士之明年歲在屠維大淵獻之春距先生歿十有六年矣余生也晚禮先生於祠考先生之行謹敘次其梗概傳用以俟後之君子俾讀而有感云爾

顧庸菴先生傳

錢肅潤

先生姓顧名樞字所止別號庸庵端文公長孫幼凝重步趨不苟迨就塾父夔州公延馬文肅及吳儀部霞舟錢太守疑菴輩先後授尚書以書經名家已而從高忠憲公講求性命慨然欲弃帖括從事最上特不敢重違父意俛首操觚天啟辛酉舉鄉試爲書經名魁後屏居涇臯深自歛跡不問生產不事干謁亦不入城市不赴講會閉戶讀書於五經無不淹洽貫徹所極深研者周易一經反復潛玩曰易之學格物知至之學也晚爲易稿折衷諸家之說大約主理不主數嘗言程朱易至矣近世若孫文介明維義倪鴻寶兒易黃石齋易象正皆吾所不解又言吾祖於易理最精獨無著述僅仍舊解略爲去取而已後生小子可妄肆穿鑿乎其於易不尚文辭益心體而躬行之矣先生之爲學原本家庭以性善爲



宗以無欲爲括而敦行以復性踐禮以克欲則其自主之階津也嘗論明儒獨服膺薛文清胡敬齋二公而謂白沙陽明未免一線之差又曰端文主無欲二字靈丹一粒點鐵成金忠憲主格物二字繭絲牛毛滴水不漏並直接宋儒其議論醇正若此

施曠如先生傳

高世泰

憲副施公諱元徵字泰先別號曠如世爲無錫人公生而不茹腥豐頤廣額爲文章精敏沉鷲萬曆戊午舉於鄉己未成進士年二十有四首謁選得台州司理台負山濱海奸民往往嘯聚公至兼攝郡篆調和軍民寇氛以輯移疾歸癸亥補京衛武學教授丁外艱服闋除南京國子助教會思宗登極崔魏伏辜而一時璫孽未靖公慷慨上封事如劉公宗周文公震孟姚公希孟等皆昌言宜大用時論重之遷刑曹旋擢職方司協理司事員外郎時都城有警環畿內外千里罕有環甲死綬爲朝廷効力者公日夜警備兼攝督捕領一十八營天子嘉厥績特旨加服俸者二賞銀幣者四除武選司郎中武選向多請囑公蒞事其弊一清楚寇亂當事議保障南服擢公湖廣按察司副使時賊已踞承天距麻城僅三百



身林書院志 卷之二  
里公疾驅至麻麻有虎頭閔巨盜實爲賊援公督兵先擒之賊失其援退而走蜀三楚復寧丁內艱起補福建按察司副使兼布政司右叅議而閩中復亂賊掠興泉漳福間公請勦於撫軍率兵駐仙邑以三部軍並進而復以一兵截其歸路賊不支故軍行七日而殺賊殆盡前後擒賊無算南歸後遂閉戶隱居飄然世外公初受業於本孺劉先生登第後乃遊先伯父忠憲之門忠憲一見稱爲任道之器自此益勵進修言動必以忠憲爲法研求濂洛閩遺書務在躬行心得不爲矯激奇特之行以釣名嘗有言曰凡事要高人一着卽是私意未淨自流俗觀之似高揆之聖賢之中道無當也斯言洵得師心印而亦善於自道矣當忠憲殉璫難公旣周旋烈禍尊得追卹復爲補疏請謚蔭後忠憲家日困止水方塘至不能守行路太息余以購復商於公公慨然倡出公議堅申大

義而余得以賞酬之卒歸舊業卽池上老屋改爲祠邀官祭焉通國莫不手額以白首門生爲此昔人居場制服不尚美於前矣公雖托於逃禪往往入名山叅古德好講出世法而未嘗暫忘東林先賢之教甲午乙未間督學使者及郡邑大夫有過問講席者爰採物望首以臯比推公公執卷登座或演舊聞或出新見能令人悅服書院自拆毀後雖未獲復舊觀而仲丁釋菜歷數十年不廢公每祭必至登降有秩灌獻有恪遠邇少長屬目心儀禮成福飲公入座輒長喟穆然情深稱說古先諷切後學客無不聳聽者邑中同善會倡自啟新錢先生暨忠憲原以分財教善兼行當年有會卽有講講卽有刻甚鄭重也歲久不無停廢得公踵行之余幸從公共事按籍給散計已舉八十一會公又深繹同善之旨恒以此敷訓於家且親課諸孫長孫某登庚子賢書公稱鄉先生幾



六十年得見玄孫鉉高老終時年七十八端坐拂鬚整冠而逝

周仲馭先生傳

明史稿

周鑣字仲馭金壇人父秦時雲南布政使鑣舉鄉試第一崇禎元年成進士授南京戶部主事權稅蕪湖以憂歸服闋授南京禮部主事抗疏極論內臣言官二事言張彝憲用而高弘圖金鉉罷王坤用而魏呈潤罪趙東曦斥鄧希詔用而曹文衡罷間王弘祖李曰輔熊開元罪且每讀邸報半屬內侍溫綸自今鍛鍊臣子委棄天言祇徇中貴之心臣不知何所極也言官言出禍隨黃道周諸臣薦賢不效而惠世揚劉宗周勿獲進華允誠諸臣驅奸無濟而陳于廷姚希孟鄭三俊皆蒙譴且每奉嚴諭率皆直臣封章自今播棄忠良獎成宵小祇快奸人之計臣益不知何所極矣帝怒斥爲民鑣自是名聞天下初鑣世父尚書應秋叔父御史維持以附魏忠賢並麗逆案鑣深恥之通籍後卽交東林矯矯樹名節及被



放與宣城沈壽民讀書茅山是非不少假廷臣多論薦之十五年  
起禮部主事進郎中爲吏部尚書鄭三俊所倚用鑣言察黜鑣舅  
揭陽知縣張明弼時論譏其薄而鑣權稅蕪湖時不能持廉遭物  
議爲人好名頗飾僞給事中韓如愈疏論之罷歸福王立于南京  
馬士英既逐呂大器以鑣及雷縝祚曾王立潞王議令朱統鑣劾  
曰廣因言鑣縝祚等皆曰廣私黨請悉置於理復指鑣權關事王  
令刑部逮治而士英劾周鍾從逆并及鑣鍾亦逮治鑣叔父維持  
鍾弟前蕭山知縣銓因言鑣與鍾有隙私刻燕中紀事國變錄諸  
書爲撰勸進表下江南策誣鍾爲之致臣家臣邑不能洗從逆名  
且鑣倡異謀罪在社稷詔所司并勘阮大鍼居金陵時諸名士顧  
景等出留都防亂公揭討之主之者鑣也大鍼以故恨鑣鑣獄急  
屬御史陳丹衷求解於士英爲緝事者所獲丹衷出爲長沙知州

於是察處御史羅萬爵希大鍼指上疏痛詆鑣且徧詆東林謂已  
與大鍼張孫振有擁戴功詔并下所司究問明年三月誅妖僧大  
悲御史王儂因言斬百大悲不如斬鑣縝祚夫真主旣出海內帖  
然乃今日冒皇子明日冒皇后由二人譏訕新政故訛言繁興不  
立斬二人恐魚腹狐號乘間竊發末力頌統鑣大鍼及劉澤清朝  
士皆覲其言而光祿卿祁逢吉鑣同邑人見人輒言鑣遂得爲戶  
部侍郎何左良玉稱兵檄討士英罪言引用大鍼構陷鑣縝祚  
鍛鍊周內士英大鍼益怒而鑣友人桐城左國樞蕪湖沈士柱皆  
嘗列名防亂公揭避大鍼客良玉所大鍼謂鑣召良玉兵王乃賜  
鑣縝祚自盡



成寶慈先生傳

明史稿

成勇字仁有安樂人天啟二年會試答策極言宦官之禍被放又三年成進士同年生邀謁魏忠賢持不可授饒州推官謁鄒元標於吉水師事之中使至知府以下俱郊迎勇獨不往且捕笞其從人中使將愬之忠賢會敗獲免丁內外艱歷開封歸德二府推官流賊攻歸德乘城守擊敗之崇禎十年行取入京時變考選例優者得爲翰林公論首勇而吏部尙書田唯嘉爲任濬地抑勇及他寡援者二十三人爲部曹勇得南京吏部主事輿論大譁勇恬然不數日卽辭朝去明年二月帝御經筵問講官保舉考選得失諭德黃景昉訟勇及朱天麟屈講官羣和之帝親策諸臣天麟得翰林濟亦得御史而勇以先赴南京不獲與等用御史涂必泓言授南京御史楊嗣昌奪情入閣黃道周何楷林蘭友劉同升趙士春



言之咸獲譴勇憤其年九月上疏曰禮莫大於倫倫莫大於君親未有不知君親而可齒於人類者也況儼然秉國之鈞天子是毘者乎嗣昌謂古列國之君臣可得而避今一統之君臣無所逃於天地之間是三年之喪可行於古不可行於今也嗣昌所引者何代之經所遵者何國之典信如其言是凡爲臣者皆不當終三年喪終則爲後君爲不臣先聖之書詩可焚先王之典禮可廢不舉人類化爲禽獸不止留一嗣昌而生天下不臣不子之心何如去一嗣昌而樹萬世爲臣爲子之鵠嗣昌豈以一身去留係社稷安危耶秉樞兩年一籌莫展邊境頻告流寇披猖無問其經濟矣清議不畏名教不畏先聖之訓詞萬世之是非不畏無問其品望矣嗣昌去則所全者大旣盡子道亦完臣節不則旣爲今日之賊子必爲他日之亂臣且旣不知有父矣又孰猶子之誼事程國祥以

其爲父同年讓行讓坐何薄於親而厚於親之友耶疏入帝大怒命削籍提訊刑官擬杖徒不許嗣昌疏救亦不納乃擬遣戍命詰主使姓名勇獄中上書言臣十二年外吏數十口南臺無權可招無賄可納不知有黨帝怒切責竟戍寧波衛中外薦者十餘疏皆不召最後用劉宗周張瑋言命吏部覆議久之執政合詞請擢用命刑部核奏請復故官帝以勇宥罪方新不當復職命以他官用甫聞命而京師陷福王時起御史不赴後披緇爲僧越十五年而終



刁蒙吉先生傳

高世恭

先生姓刁氏名包字蒙吉別號用六居士北直祁州人貞惠先生諱克俊之子幼負異才能日讀千言有黃冠相之曰鳳目獅鼻山頂虎背亭亭岳峙非凡相也迨涵養日充剛方厚重見者有泰山巖巖氣象持身不苟見義勇為生平力學要在謹言行閑程朱一脉之傳舉天啓丁卯鄉試再詣春官不第因慨然謝公車一意聖賢之學構齋曰潛室亭曰肥遯置五經四子性理綱目濂洛關閩諸書其中讀之忘寢食遠邇慕之來學者屢滿戶外著希聖學規十二條以相砥礪甲申闖變設思廟主服衰朝夕哭臨及偽命敦趣七發書拒斥之幾及於難會闖敗得解自後肥遯志益決日惟杜門立課考驗身心案頭置一冊名潛室劄記有得雖夜半必篝燈識焉取古文之發明正學者彙為斯文正統以授學者嘗曰道



之不明禪學害之也禪何與於吾學借禪以混於儒者害之也爰作辨道錄帝辨姚江傳習錄之非先是聞容城孫鍾元先生闡良知之學以子靜直接孟子陽明直接陸子心竊向之後乃折以羣儒析其純駁衡量謹嚴丝毫不爽歲戊戌始得先伯父忠憲遺書讀之喟然謂此聖學真派也吾尊之若天地親之若父母敬之若神明乃所願則學高子也置主奉之順積樓一如奉貞惠禮自檢或有過差或工夫稍不精寔卽詣兩主前長跪自訟久之方起每推先忠憲爲朱子後一人欲以遺書續近思錄朱子節要之後明儒自嘉隆後統緒日岐得先生論定始有薛胡羅高之稱復上書燕山王大宗伯謂河津餘干已從祀泰和梁溪當補祀其服膺先忠憲如此事父母至孝父歿三日勺水不入口哀毀月餘鬚髮盡白治喪一倣古禮旣葬廬於中庭三年不葷酒入內母年九十三而歿先生年已六十有六號慟幾絕嘔血數升病卧猶席衰加絰不數月病革肅衣冠起凝神正坐命子濂告辭家廟母柩及忠憲主前從容而逝學者私謚爲文孝先生

石屋遺氓曰昔孟氏未得爲孔子徒竟以私淑肩尼山之統先生屹起伊邠紹衣正學迹其心師先忠憲事死如事生云時地雖隔謂之梁溪見知可也先生屢曾寓書東林與余徃復論道而余徒負淵源無能效麗澤之益先澤未斬願學在人世之聞先生之風者可以興矣



陳子衆先生傳

高世泰

先生姓陳氏諱揆字子衆浙之嘉善人也少善病絕意進取專心經史多所發明父幾亭先生故先忠憲門人方有明萬曆甲辰重建東林書院其時四方學者觀海來遊執經請業於先忠憲者背趾相錯而幾亭先生寔稱入室弟子先生淵源家學晚歲研悅性理哀輯幾亭全書人之讀幾亭書者僉謂幾亭有子先生爲人謹飭端重虛已下人以余爲先忠憲從子執子姪之禮維謹其生平學問所發作而見之文字者甚多而八德齋戒二篇尤爲探天根而躡月窟備載余紫陽通志余服膺先生最切而先生亦謬以余爲知道凡函文晤對竿牘往來所商確皆聖賢甲裏事故余以爲東林自先忠憲而後壇坫久虛若得先生尸之庶幾老成典型於是乎在因欲倣朱韋齋公命其子文公師事劉白水與胡籍溪劉



屏山三先生故事貽書敦請冀先生至止爲見輩矜式而先生亦適于辛亥七月二十一日修書并詩箋見寄命其使曰爲我往別梁溪高某使不解何語比持余札歸則先生已於二十三日午刻端坐而逝嗚呼先生已矣惟是道南一脈前無古人後無來者茫茫墜緒我其如先生何先生其如我何然于此可以見先生居平之得力于學問者深用是于去來之際洒脫如斯也爰以先生祔祀于幾亭先生之旁歔歔涕泗而爲之傳

高彙旃先生傳

熊賜履

先生姓高氏諱世泰字彙旃晚號石屋遺氓無錫人明倡道東林忠憲公諱攀龍從子也贈公諱士鶴於東林復建之歲生先生生而凝重如老成人性孝友與諸兄弟讀書必雁序好學疆記贈公每於夜臥蹴呼背誦日所讀書更雜問他卷中句字輒琅琅不失一字少侍東林講席忠憲公卽以道器許之年十五爲邑弟子員崇禎丙子舉應天鄉試第六明年中會試廷對擬第一以嘗忌東林者擠之抑置二甲第一故例同年序齒錄多懸年先生曰父母生身之年可忘則何所不忘具以實書授禮部主客清吏司主事已卯奉命主廣東鄉試先是忠憲公以建言謫廣東揭陽縣典史途中發憤進道往返三時著有三時記先生至是携以爲法庚辰陞本部司員外郎郎中旋有湖廣按察使司僉事提督學政之命



先生初拜命疏言鄉飲濫觴優劣失實請申飭有司得優旨獎勵  
分列遵制明道宗經習史敦行適用舉才釐弊之條廣厲學官著  
真偽偏全邪正三者之辨謂入門一誤途徑遂差生心害政由此  
而致楚人士無不悚息自新者江夏故有濂溪書院因下令修葺  
遴通省學者二百餘人砥礪其中立會規五則有收爾精神慎爾  
威儀調爾性情等語凡初入為弟子員者必令謁賀亨陽先生家  
求人模樣一冊以示矜式時武當山太和宮有內監司香稅者謁  
文廟脇諸生講書明倫堂諸生非之稅監怒誣陷諸生數十人以  
毀拆宮坊入告奉嚴旨著學臣回奏先生疏言內監僭虐罪狀為  
諸生辨理甚力得旨撤回寬諸生獄纂三楚文獻刻楚衡述風始  
錄南雅諸書癸未任滿回籍自是家居事父母曲盡孝養而無日  
不以東林先緒為已任葺道南祠麗澤堂更建燕居廟再得草廬

三公祠備俎豆飭威儀集一時同志恪遵忠憲遺規春秋會講四方  
學者相率造廬問道祁陽刁先生包篤信忠憲為師與先生往復  
論學朔南相望學者有南梁北祁之稱休寧汪學聖叅究禪宗幾  
二十年聞先生講道東林野服造門而請先生與言後學宗派惟  
程朱程朱宗派惟孔孟闡發程朱是為正宗厭薄程朱是為亂宗  
世之談性者既荒唐於禪宗之徒尤荒唐於援儒入禪之徒必欲  
堅持三教一家之說惜誤用其精神矣留語數十日而學聖遂悟  
從前所學之非閔中李顥學尚姚江特造東林會講先生因語之  
曰言滿天下無口過其惟紫陽朱子乎六經皆我註脚是陸象山  
之口過也滿街都是聖人是王新建之口過也顥因答云陸王矯  
枉救弊其言如藥中大黃巴豆疏人胸中積滯未可概施之虛怯  
之人先生所慮極是退而語其從遊謂宜奉為典型新安汪知默



陳二典胡崧汪佑吳曰慎朱弘施璜輩講朱子之學于紫陽書院因汪學聖遊先生門相次問學於是更定紫陽通志錄以廣薪傳又以中庸一書與紫陽諸子答問往復著中庸問答先生之學近守忠憲遠宗朱子而尤以朱子大學格物補傳爲聖賢切實要領工夫謂朱子早慮後人認作空知但說靈明知覺而於事物都不能貫通故提出一理字以實知字再提出表裏精粗以實理字蓋人心之靈猶如火火必有所附麗而後見其光明物乃知之附麗處格則推致廣遠所以用而不窮之法也離物言心遂爲二氏之別傳舍格物而單提良知終非聖門之正的爲其與致知在格物之旨不符耳故講大學者或提致知或提修身或提誠意頭緒愈紛不如仍本聖經明文在格物爲大定同邑菰川張夏嘗贊之曰必先格物必讀補傳不雜二氏嚴辨無善於紫陽爲聞知於忠憲

爲親見肫肫乎孺慕之終身惓惓乎葵藿之餘戀侃侃乎劬瑤之勁節矯矯乎挂冠之卓撰循循乎院規之博約秩秩乎家法之詒燕皆實錄也先生主東林書院三十餘年構止水祠祀忠憲纂高子節要輯年譜踵行忠憲同善會八十六次孳孳焉守忠憲之道以待後之學者故學者莫不知有彙旃先生其歿也上距萬曆甲辰東林之建蓋七十有三年云先生督學吾楚先公受知實最深嘗拔置濂溪書院命主講席先公感先生之教遺訓家庭必毋忘東林一脈然則先生之教思不私吾楚而吾楚之被澤亦弘且遠矣



熊祈公先生傳

錢肅潤

熊祚延字祈公湖廣孝感人幼莊重寡言笑弱冠補博士弟了下  
 帷攻苦厄羸骨立長老皆服其精進嘗曰聖門唯顏淵好學不幸  
 早卒曾子獨能大聖道之傳于是哀集曾氏生平言行編為一帙  
 曰希曾錄朝夕展玩亦步亦趨未常少違孝事父母色養兼至母  
 病篤籲天請代處友重然諾見義勇為四方學者造門請益則謂  
 之曰聖學無過求仁仁道至大其體無方其用不息學者求仁誠  
 非弘毅不為功彼二氏之謬妄百家之支離正坐不弘不毅耳爰  
 作弘毅解示學者學者稱為弘毅先生先生於書無所不讀自經  
 史外如天文地理河渠兵法禮制樂律一切經濟書靡不洞悉源  
 委而尤究心當世之務默坐澄觀籌度曾不爽毫髮居恒每自比  
 管葛而顧不輕於一試故人亦莫之識也崇禎甲戌流寇大起鄉



里震動先生避地白雲山將終老焉諸父老請於先生謂公邦人領袖信義素爲所服若義旗一舉四方響應相與戮力保障以待官軍賊宜可辦也且多出衆言激之先生不得已同衆出山糾集義旅布部伍申約束立營寨整器械旬日之間軍事大備賊聞之遁去相戒勿犯熊公里如是者數年鄉人安堵如平時先是有勸先生應制舉者先生曰予將效魯仲連蹈東海死爾何應舉爲至庚辰辛巳間無錫高公彙旃督楚學政興復濂溪書院修明正學先生瞿然起曰吾聞高公係忠憲公從子爲東林嫡傳安可當吾世而失之始携弟祚永同出應試高公閱卷亟加嘆賞拔冠一軍待以殊禮遂入室考道研精高子遺書得東林先賢洛閩一脉歸而集衆衛鄉里如故公何爲里左豪惡所忌勾引賊衆大至爲亂乃號召義旅若干人與賊交鋒會大風霾晝晦士卒相失先生僅

從十餘騎遇賊大隊於水田中田淤馬足陷竟被執因仰天嘆曰予老逢掖不知兵且平昔服膺曾氏教臨深履薄兢兢惟隕越是懼不幸遭世亂竟落賊手循省生平有乖全歸之義誠無面目見先賢於地下旣乃曰成仁取義孔孟訓也我心如皎日更復何恨言已罵賊不絕口遂被害時長君賜履方九齡能讀父弘毅齋諸書守之勿失順治戊戌成進士入翰林累官武英殿大學士兼刑部尙書康熙庚戌以覃恩贈其父如子官其後賜履歸里讀書下學堂作學統全書及閑道錄皆明先生之學也次君賜瓚丙辰進士官翰林院編修一堂砥行並能復先生之教云



于其對不啖其且平昔服曾月幾謝彩姆草效效謝則幾是  
發十箱禱匪想大湖飲水田中田然思且剖竟好持因仰天歎曰

惲遜菴先生傳

高 崧

先生姓惲名曰初字仲升武進人初為名諸生與復社楊維斗錢  
吉士諸公角藝論文即以天下為己任聞其師劉念臺先生絕粒  
死為位以哭甲午拜劉先生墓於下蔣其子洵彙平生著述成全  
書排次事蹟為年譜曰初訂正并為先生作行狀其末云曰初之  
得從先生學也以清惠張公故清惠從先生所歸命曰初亟往見  
曰劉先生今之周濂溪也後數年先生罷中執法乃始執弟子禮  
謁見先生於都門因侍問咨請先生既直舉原本視之又責以鞭  
辟近裏一日先生視以未發與發陰陽動靜一砂之妙曰初曰此  
理在心體之自見而求之書冊者不信也如中庸末言上天之載  
無聲無臭又何居先生曰正中庸一書歸宿也不徒曰天而曰上  
天之載分明有主宰是者此主宰非耳目見聞所及故曰無聲無



臭吾人行止起居寤寐飲食無非此消息卽至萬事萬化闔闢縱橫未嘗動著纖毫乃所謂無聲無臭也豈求之窅窅冥冥莽蕩無歸者哉日初聞教增悅復進日中庸旣明道之所自由又從夫人之所大同者指出中和若曰天命之性非他也卽此喜怒哀樂是也子思辨繫爲人於此最切首從天命起未歸天命結中間就日用人倫天下國家章王其大用極之聖神功化而一本於天德之達不得有幾微增損夫子謂一書歸宿恍在是乎先生曰今日所言毋已太高更須自己反觀得力安在日初日俗儒病坐不知若使知而不行與不知何與程子曰識得此理以誠敬存之而已所以慎獨爲千聖傳心之要劉先生領之其爲狀大略如此一日携狀過梁溪并劉先生平日所著書畧余祖學憲公上曰先生壬子起官道謁忠憲相與講正有問學三書皆儒宗關鍵劉先生之學

卽忠憲公之學也因作高劉兩先生正學說略曰忠憲先之得之悟畢生祇重修持會稽先生得之修末後亟稱解悟忠憲先生以格物爲宗成乎形之謂物本乎天之謂則會稽先生以慎獨爲宗一於位之謂獨原於性之謂誠要以窮理主敬用各有當而進實相資孔門之博約也虞廷之精一也兩先生所由有接其傳學者惡容以偏廢也宗仰高劉窮理主敬之學契合如此學者稱遜菴先生



孫蘇門先生墓誌銘

湯斌

康熙十有四年乙卯四月二十一日前萬曆庚子舉人徵君孫先生卒於輝縣夏峯之居第一時監司郡縣之大夫與方數百里鄉大夫士哭弔屬路不絕城內外市者罷畊者廢耒里老嗟嘆子弟輟誦絃聲督學使檄郡邑列祀百泉書院其冬十月十六日葬夏峯之東原距生萬曆甲申十二月十四日享年九十有二矣道學之傳自濂洛關閩諸大儒後莫盛於明之河東姚江先生幼當梁溪吉水講學都門之日與鹿忠節公一室默對以聖賢相期許忠節既沒獨肩斯道者四十載年愈高德愈劭真積力久篤實輝光四方學者不謀而合曰夏峯今之河東姚江也兩朝徵聘十一次纒帛責於嚴谷守令敦趨就道者數矣先生堅卧不起故天下稱為徵君焉先生諱奇逢字啟泰號鍾元保定之容城人高祖端曾



祖廷寶皆有隱德祖臣嘉靖辛酉鄉薦任河東鹽運司運判以清  
慎稱父丕振庠貢授儒官孝友著聞母陳孺人兄弟四人兩兄奇  
儒奇遇皆庠員弟奇彥以貢士任武城知縣先生少年慷慨有大  
志十四歲謁楊尚寶補庭補庭問設在圍城中內無糧芻外無救  
援當如之何先生應聲對曰效死勿去補庭曰此足卜子生平矣  
補庭者忠愍公子也十七舉於鄉私第不蓄一錢兩居父母憂治  
喪一準古禮偕兄弟結廬墓側飲食必祭風雨霜雪哀音動人嘗  
語人曰少年妄意功名自雙親見背哀慟窮苦中証取本來面目  
覺向來氣質之偏蓋學問實得力於此云居京師見曹貞子公舉  
仁體以告恍然此心與天地萬物相通時桐城左忠毅嘉善魏忠  
節長洲周忠介以氣節相高見先生皆傾蓋定交高陽孫文正公  
督師閔門鹿忠節爲監軍約先生同遊塞上徧覽山海形勝指畫  
如掌孫公留共勦軍事急辭歸語茅元儀曰將相不合未有能立  
功於外者公信不愧吉甫如時不可何天啟末年逆閹竊柄左魏  
周三君子相繼逮繫過白溝緹騎森布先生與門人張果中拮据  
調護供其橐餗且告之曰雷霆雨露總是君恩諸公主張宜早定  
其子弟僕從厥衛嚴緝莫敢舍者先生與鹿太公爲之寄頓左嘗  
嘗督學三輔又屯田有惠政時坐熊經略賊考掠備至先生與鹿  
太公謀設匾建表於門曰願輸金救左督學者聽於是鄉人投匭  
者雲集左旣考死則又按籍俵散去京師不二百里舉旛擊鼓不  
畏闔知闔亦竟不知也當事急時遣弟奇彥同鹿公子馳閔門上  
書高陽公求援公卽具疏以邊事請陛見面奏機宜都門喧傳公  
興晉陽之甲闔夜繞御床而泣公抵通州亟降旨勒回公回而諸  
君子不可救矣蓋正人爲國家元氣非但急友難也事之不成則



天也而世徒以節俠視之過矣客氏弟光以時罔牢籠士大夫介所知送名馬以家貧不能具芻秣辭致芻秣之需以病軀不能乘辭待小人不惡而嚴類如此崇禎戊辰督學御史李公蕃舉孝行奉旨建坊旌表給二丁侍養丙子容城被圍土垣將圯窮七晝夜爲攻具先生指示方畧士民協力捍禦城賴以全事定巡撫都御史恤刑部郎交章聞於朝特詔褒嘉兵部尚書范公景文聘贊畫軍務回辭不就時寇氛漸逼都城携家入五峰山結茅雙峰親識從者數百家修武備嚴教條所以整齊約束之法甚具更日與其徒講學習禮賦詩倡和絃歌之聲相聞當兵戈搶攘時雍容禮樂盜賊睥睨不敢犯嗚呼先生之不用於時豈先生無意於世蓋亦知天意之不可回也 國朝順治初祭酒特舉長成均以許文正相擬中外大臣推轂日至先生絕意仕進移家共城闢兼山堂讀

易其中率子孫畊稼自給簞瓢屢空怡然自適遠邇負笈求學者甚衆有大僚歸老於家北面稱弟子者有千里遣其子從遊者公卿持使節過衛源不入公署屏騶從以一見先生爲快先生涵養益邃自強不息每晨起謁先祠畢退居一室澄心端坐卽疾病未嘗有惰容接人無貴賤少長各得其道與後學答問隨人淺深疊疊窮晝夜不倦子孫甥姪數十人揖讓進退皆有成法閨門內外肅肅穆穆寂若無聲而諸事俱有調理嫺族故舊恩意篤厚爲之經理婚嫁喪葬惟力是視聞節孝事必爲之表揚先賢祠祀廢墜者必倡衆爲之修理見人家庭乖違與父言慈與子言孝緩譬曲喻必歸於道而後已故賢者悅其誠不賢者服其化卽兒童牧豎亦知歡喜尊敬至於事變之來衆人震撼不知所抵者處之裕如未嘗幾微動於中也其學以慎獨爲宗以體認天理爲要以日用



倫常爲實際嘗言七十歲工夫較八十而密此念無時敢懈此心  
庶幾少明又曰生平所見有時而遷而獨知之地不敢自欺識得  
天理二字是千聖真脈非語言文字可以承當故言心卽在事上  
見言已卽在人上見言高遠在卑邇上見言上達在下學上見戰  
兢惕勵不敢將就冒認慎是慎獨而已所著有理學宗傳四書近  
指讀易大旨書經近指聖學錄兩大家錄甲申大難錄歲寒居文  
集答問日譜畿輔人物考中州人物考孝友堂家乘四體酌乙丙  
紀事孫文正公年譜共若干卷嘗嘆世之學者不務心得株守落  
籬物我未化先生真見道之大原無建安無青田惟以庸德庸言  
直證天命原初之體可謂千聖同堂造化與遊者矣程子曰世無  
真儒天下貿貿焉莫知所之人欲肆而天理滅自先生講道山中  
公卿大臣四方學士聞風而起皆知聖賢之可爲異端邪說不足  
以亂孔聖之真其有功於斯世斯人大矣若其自得之深精微之  
蘊非學問有得於心者烏能測其所以然乎斌何敢謂知足以知  
之然奉教有年竊觀其語默動靜元氣渾淪全體大用光明洞徹  
其斯爲凝道之君子何疑歟



東林書院志卷之十二

列傳六

秦大音先生傳

高 隆

先生姓秦氏諱鏞字大音號弱水先忠憲公高第也父水菴故事忠憲爲入室弟子并率先生拜忠憲於講壇誠之曰自今以後一言一行必以吾師爲法先生遂受業焉強學力行克成父志崇禎丁丑又與余祖彙旃公同登進士文章氣誼互相砥礪旋筮仕江西清江旣又補山東蓬萊後以考選擬授儀曹姜公曰廣在揆席颺言衆中秦某清品真才他年公輔器也乃擢河南道監察御史居未久見國事日非遂力求去歸隱於東林之南顏曰千休館歲時朔望謁祖祠外終不一至家也先生幼有孝行事父母竭盡色養撫二弟友愛特至且以道義相劇切居官公勤仁恕所至輒有



善聲去清江時上官檄催門稅甚急乃捐俸三百金應之謂父老曰以此爲汝曹別已卯分校秋闈所得多名宿巴縣令王錫以殉節終者其首薦也考先生生平孝友型於家忠信播於鄉惠愛施於民靖獻著于國讀聖賢書行聖賢事與忠憲之學如符節然居千休館後一以造就人材爲念錫之人士爭學焉年六十五而卒門下士私謚曰文孝先生且立祠於千休館猶祀忠憲於止水之義也繼復公請從祀道南祠附水菴先生旁父子同事一師復同祀一堂豈非古今所希觀者哉

胡慎三先生傳

高 嶒

先生姓胡名時忠榜名時亨字伯昭別號慎三無錫人幼孤力學卽心慕先忠憲之爲人崇禎丁丑與余祖學憲公同登進士第往來問道交最厚謁選授南昌府推官南昌省會繁劇民風刁訟宗室囂陵先生仁明清簡具有風裁會妖賊張普微亂定策禽斬首從百餘賊遂解散悻宗五閩王等肆橫揭院題叅地方以安及饒州寇叛用以盜攻盜之策悉平之時民飢盜起數出方畧定進賢萬年金谿諸邑變矣未春土寇李肅十等僭號通楚獻賊巡撫張公鳳翮會虔撫林公一柱檄行監軍道事先生出竒用間以撫爲勦不越月八獻竒功悉斬元寇大書荷戈爲賊荷鋤爲民二語以安反側又念難民未甦發廩賑濟清還子女收葬枯骨時慶更生奉新靖安安義三縣各立生祠及陞任去闔郡士民肖像祠于東



湖講堂後祀于名宦祠南都考選授福建道監察御史江西按臣周燦追敘平寇功特加一級所奏如清言路正綱常收人心陳軍功清屯清折諸疏皆侃侃大計惜不能用先生性至孝父俸有還金隱德早喪甫釋褐卽疏其母虞太夫人苦節得旨旌表居官重忠節崇道義如修孫許二公旌忠祠議留澹臺子祠租復梅子真祠皆有關風化者平時究心理學著有聖學源流錄及先忠憲續近思錄序癸巳秋常郡守宋公之普與先學憲公講道東林先生舉先忠憲教學東林之語以示學者一時群推正學云高若谷曰聖學之有源流由來尚矣先生遡而窮之而源流以清至先忠憲之學得之考亭先生謂續近思錄一編可闕朱子之集成卽可闕公之願學是深知考亭卽深知先忠憲者也先忠憲之學于是有宗矣

嚴佩之先生傳

龔廷歷

嚴穀字佩之無錫人別號生軒弘治壬子鄉薦仕至安吉州知州月軒公桂五世孫公負至性孝友絕倫弱冠補弟子員旋食餼受業於鄒經畬馬素修兩先生門家貧屏息偃庭邑長以其貧或分清俸亦未嘗走謝訓授生徒以資養親婚弟嫁妹高第多出其門一生篤學好古手不釋卷凡經史百家靡不精究尤潛心於易復攻春秋嘗課其弟穀曰讀書以理學爲主吾自得高子遺書方知有歸宿處旣而與鄉先生講道東林高學憲彙旃推爲主席作重修道南祠記又相與輯高忠憲公年譜高子節要東林志諸書公於功名兩字絕不寘念自甲申後遂永謝試檄惟於理學是究江南學憲張能麟慕其名貽以額曰力扶正學鼓素杜門終不一謁其孤介高邈類如此



王敬哉先生行狀

汪琬

公諱崇簡字敬哉其先家河間府之任丘自公曾祖光祿府君始  
來京師贅於晉故遂爲宛平縣人家譜散落不知其族望所自始  
凡再傳而家始大錦衣府君性孝友讀書知大義掌東廠太監陳  
矩賢之欲援府君爲理刑力辭不就布政府君舉萬曆中進士初  
仕潞安府推官以清節著一府人稱之曰王青天但飲潞安水耳  
自後歷官皆有聲績歿而董文敏公其昌表其墓府君無子錦衣  
府君生公甫晬卽以予府君爲之子稍長善屬文旁及詩歌古文  
辭皆優爲之相繼受知於國子監司業張公鼐提學御史左公光  
斗二公素名知人每見公文輒歎曰此公輔器也年二十六舉於  
鄉又十六年舉進士知公者欲引之入翰林公方請假營焦夫人  
葬未暇仕也而值流賊破京師遂挈其家播遷東南久之始歸順



治三年 世祖章皇帝慎簡文學之臣以儲後用公蒙首選卽授內翰林國史院庶吉士特免教習與諸詞臣一體辦事與修明實錄尋除祕書院檢討歷侍讀遷國子監祭酒入爲弘文院侍讀學士遷詹事府少詹事兼侍讀學士如故以疾請告十二年刑部右侍郎戴公明說薦公可大用吏部難之 世祖素知公遂越部議而起公於家其明年以原官兼弘文院侍講學士遷國史院學士尋以 太宗皇帝配天 詔加一級進吏部右侍郎兼學士加級如故尋轉左不數月遂拜禮部尙書又明年加太子太保公自爲諸生卽肆力於學日誦記數千言自經史諸子百氏無不貫穿每考論古今治亂興廢之故輒慨然有志當世益務爲經濟有用之術在弘文院 詔察明季殉難諸臣始末公卽疏言在內如東閣大學士范景文以下二十有三人在外如山西巡撫都御史蔡懋

德等五人或以其身仗節死或父母兄弟婦子相隨死或家人闔門大小俱死其忠烈相同宜並賜褒揚以廣作忠之典疏旣上時論悉以爲允及存禮部感 上知遇益盡心於職掌會御史乞更定帝王廟祀典公疏言廟祀自前明迄於 本朝曾經增定皆祀從來開創帝王功業顯著者至於守成令主槩不及與中間如商之中宗高宗周之成王康王其行事具見詩書漢之文帝史稱其節用愛民方內安寧家給人足宋之仁宗恭儉仁恕明之孝宗亦與仁宗相類憂勤惕厲終始不渝此七君者宜百世祀不當以守成見格又言宋臣潘美不當在從祠列張浚三命爲將凡三致敗一敗於富平則關陝遂陷再敗於淮西則酈瓊叛命三敗於符離則中原遂不可復且劾李綱殺曲端與岳飛議不合奏其積慮在於併兵雖爲南渡名臣而初無灼然可見之功亦當罷其從祀



東本書院志 卷之二十二 五  
詔議禘祭禮公疏言宜奉 肇 興 景 顯四祖及 太祖南  
向 太宗東向又 詔議大享殿合祀禮疏言 本朝所封啓運  
山宜附中岳壇天柱隆業二山宜附北岳壇如前明附祀例有建  
議請祀周公於孔子廟者公獨以爲不然疏言周公制作前代比  
諸帝王今旣配享武王於廟禮數隆重若復祀諸文廟之中於體  
爲褻非尊崇之得也議者謂北岳恒山立廟曲陽非是公以先儒  
言考之曰按曲陽有三地里志上曲陽屬常山郡在恒山北谷下  
曲陽屬鉅鹿郡鼓聚少陽亭晉荀吳滅鼓其處也今之曲陽旣非  
鼓聚又不在北谷距恒山絕遠遂疏言宜從議者移祀渾源州爲  
便是時天下大定 朝野乂安 天子銳意興禮樂公旣鉅儒  
問學淹洽爲 上所委任而又身居禮官之長一切制度治草必  
皆援古證今侃侃建白雖或 廷議糾紛亦皆俟公一言而決

上亦必從公言由是眷注日厚公有賢長子曰胥庭先生熙先與  
公同爲學士至是亦以考績加禮部尙書父子後先同列海內榮  
之以爲 國家異數王氏盛事晚近數百年以來所無有也顧  
天子方嚮用公而公且以夙疾請告矣疏凡再上優 詔皆不許  
會 世祖皇帝奄棄羣臣公治 大行之喪及議今 天子登極  
禮儀日夜辦事左翼門疾大作又再疏請解任 上不得已予告  
公雖里居士論益翕然推之康熙三年疾良已人咸望公復用或  
私相告語曰 天子且旦暮召公而公於是歲亦甫年六十有三  
動止康寧如少壯者故事當赴補公徑不肯起遽以老乞致仕自  
是迄公之歿凡十有五年終不復言出矣一時有識無不爲公惋  
惜亦無不服公進退大節以爲仕宦者所難公交游滿天下少時  
所親密者率多文章意氣之士旣躋貴顯猶汲引不少息雖卑門



後進輩行濶絕每到門投謁必相與握手款曲凡被公禮遇者人  
人色喜謂王先生親我也諸所獎借其後率皆成名性清慎不苟  
於財嘗貸前明中貴人何某金百兩何死於盜公無所歸金遂舍  
諸僧寺且設位爲文以告曰吾用資故人冥福有同年生宋君某  
者寓赤金百兩白金千兩於公其家不之知也宋君歿公促其子  
至如數與之金其子大驚願以其半奉公爲壽公笑曰如是則與  
乾沒有異乎竟悉予之平居無聲色博奕之尚晚歲益嗜澹泊惟  
潛心先儒義理之說以躬行心得爲主於諸儒論難不強爲異同  
及其發之於文原原本本下筆輒數千言而悉根柢乎六經其論  
詩風雅正變則謂論正變以體不若論之以聲蓋體由聲而定也  
三代以上詩與樂出於一古人以聲詩奏之樂是故詩之本在聲  
孔子刪詩得其聲則存不得其聲則不存或謂詩有正變聲何以  
有正變不知宮商角徵羽正也變宮變徵皆變也後儒補六笙詩  
又補肆夏詩皆未達乎聲之義者也論春王正月則謂春秋之作  
孔子尊王之作也因魯史之文遵周代之制槩乎無可疑者使以  
夏時冠周月是倍王非尊王也是故孔子所書春者卽周之春所  
書正月卽周之正月也其說悉有裨於學者至其他碑銘之文尤  
見重當世子若孫欲榮其祖父者往往數千里惟公之歸其辭皆  
典核有則今翰林侍讀學士葉君方藹序公集曰色黜然而光味  
冲然而長蓋實錄也間名賓從子姓與之觴咏及嬰遯山水間所  
賦詩清新整麗見者爭傳頌之有青箱堂詩十卷續詩十二卷文  
集卷家譜年譜各一卷雜著述若干卷以某年月日邁疾卒於  
正寢以某年月日葬於西城關外坊畏吾村之西



孫北海先生傳

錢肅潤

先生姓孫名承澤字退谷別號北海順天大興人崇禎辛未進士  
累官至吏部侍郎生平博學嗜古著書甚富其有關正學者尤莫  
如五先生學約及考正晚年定論二書序學約云學非博不足窮  
理非約不足明要博而寡要則汎濫無歸聖門所不貴也宋朱子  
集周程張四先生書撮爲近思錄近錫山景逸高公取朱子文集  
語類倣近思錄爲節要兩書精粹切實余讀之不忍釋手謹照原  
本十四類每類中語各集一處或語意重複及全集中有可入者  
間有損益名曰學約蓋天下之理約於五經四書經書之指約於  
五先生五先生之學約於近思錄節要二書雖卷帙不多而全體  
大用備焉此聖道之真傳也其序晚年定論云陽明有朱子晚年  
定論一書或謂其一生抵悟朱子晚年作定論其悔心之萌而尊



朱子乎予曰否否此正陽明深詆朱子也朱子著述較周程諸子為多陽明獨摘三十條為定論又不言晚年始自何年但取偶然讓抑或隨問隨答語及早年微涉頓悟與陸子靜合者俱坐以晚年自悔目為定論予嘗考之朱子年譜行狀文集語類乃知朱子四十五始與陸氏兄弟交嗣後年愈晚關邪愈堅寧有一字合於陸氏一言涉於自悔者此予所亟欲考正者也時先生年已八十有一矣蓋先生尊信紫陽老而彌篤如此不踰歲卒卒之後柏鄉魏公致書錫邑吳侯謂北海先生之學其得忠憲高公之統者也於是錫邑後學羣舉而入道南祠

龔震西先生傳

高 嶧

先生姓龔名廷歷字玉臣別號震西本常之武進人自湖干徙居無錫熙春里順治壬辰成進士除湖州府推官治績見李荅平讞錄時上官有以叛黨陷平人者先生不可上官怒爭之益力乃罷職歸家居好讀書早暮手不釋卷凡天文地理諸子百家靡不分類以編晚益潛心考道與先學憲公講學東林書院至老不衰著有願學編理學醇疵辨諸儒語錄諸書而自記留耕堂有云予祖業二頃比年災於澇災於曠復災於虫予曾不介意予所憂者貪泉禍水溺心霑潦焦思燥性煽虐驕陽三彭二豎蝕根蝨賊予願以仁為穀種義為時措禮嚴經界智析莠苗毋欲速而同宋人助長毋不熟而譏萑稗弗如遜志時敏以當終歲之勤動德鄰仁輔以承雨露之灌滋樂道進修以為逢年之銍獲彼以耕為耕者夫



子所謂餒在其中以學為耕者孟子所謂飽乎仁義也以田為田者一歲曰菑二歲曰新田三歲曰畬不過數年之計以心為田者吾耕之課吾子耕之吾孫與曾孫耕之斯為百年之計也夫為百年之計則所耕者既深所留者不亦多乎斯言也當耕而耕始終無一計功程效之心夫是之謂純心之學

湯潛菴先生墓誌銘  
康熙二十六年冬十月某日工部尚書睢州湯公斌薨於位年六十有一公之病也上遣御醫診視及薨又遣滿漢學士以潼酪奠公柩命其孤馳驛護公喪歸人詔予祭葬如故事訃聞於吳先是公嘗駐節吳中去逾年而吳人追思不怠為公建生祠於學宮至是會哭祠下者數千百人悉號慟失聲有識謂數百年來自周文襄王端毅兩公而外巡撫未有如公者也而前公巡撫江南者方柄用世燄張甚忌公聲望出已上又嘗以事徵賄巨萬於吳有司有司議率民財以應公禁不許遂銜公刺骨公既去吳還朝上眷注益厚忌者日夜用蜚語讒公於上前必欲擠諸死地賴上神聖稔知公無他故得保功名以終逮公捐館舍未逾月而忌者事敗踉蹌出都門凡都人士訖吳中父老子弟咸指斥夫已

湯潛菴先生墓誌銘

注 琬

康熙二十六年冬十月某日工部尚書睢州湯公斌薨於位年六十有一公之病也上遣御醫診視及薨又遣滿漢學士以潼酪奠公柩命其孤馳驛護公喪歸人詔予祭葬如故事訃聞於吳先是公嘗駐節吳中去逾年而吳人追思不怠為公建生祠於學宮至是會哭祠下者數千百人悉號慟失聲有識謂數百年來自周文襄王端毅兩公而外巡撫未有如公者也而前公巡撫江南者方柄用世燄張甚忌公聲望出已上又嘗以事徵賄巨萬於吳有司有司議率民財以應公禁不許遂銜公刺骨公既去吳還朝上眷注益厚忌者日夜用蜚語讒公於上前必欲擠諸死地賴上神聖稔知公無他故得保功名以終逮公捐館舍未逾月而忌者事敗踉蹌出都門凡都人士訖吳中父老子弟咸指斥夫已



氏姓名戟手相誦誓以其媒竭公故也由是朝野公論始大白而公之志不獲伸於地上庶幾其伸於地下矣越明年諸孤將卜葬州東南黃岡之阡先期遣使以書及行狀來請銘琬嘗與公同爲史官又辱知交最深乃核其世次官閥事行之實序而銘之謹按公字孔伯別自號荆峴晚又號潛菴先世由滁州之來安以軍功爲金川門世襲百戶其後調睢陽衛遂家於睢後又以功世襲指揮僉事五傳至明威將軍岷州衛守備諱某者公高祖也曾祖趙城縣縣丞諱某祖州學生諱某考州學生諱祖契以公貴封中憲大夫陝西按察司副使妣趙恭人李自成之亂恭人被執不屈死琬嘗文其祠堂之碑繼母軒太恭人公少不好弄稍長益以學自奮於書無所不讀而尤好習宋諸大儒書年甫踰冠舉順治戊子科鄉試明年會試中式越三年成進士改弘文院庶吉士授國史

院檢討時方議修明史公疏言宋史修於元至正而不諱文天祥謝枋得之忠元史修於明洪武而亦並列丁好禮普顏不花之義陛下應天順人而元二年間前明諸臣猶未達天心抗節以死者似不可槩以叛書乞頒寬宥之詔俾史官得免瞻顧則諸臣幸甚政府見公疏不悅世祖顧名至南苑慰勞再四於是聲譽大著居無何詔遷翰林官任監司俾習知民事以需大用公與在選中出爲潼關道副使於是中原初定王師方下滇蜀關中當用兵孔道征調往還者旁午頗驕橫不戢民間苦之加以差徭煩重相率竄走山谷公戒屬吏毋苛取民財毋忘用驛夫兵來吾自應之已而駕馭有法來者悉奉約束惟謹不三年流民歸復業者踰數千戶關中多盜公嚴行保甲法量地遠近俾民間各設鉦鼓砲石盜至卽以傳警頃刻數百里近者赴救遠者各扼要地盜故



不敢發發亦輒得所屬遂大治陞嶺北道參政公治所在顛顛四  
省上游地穹山深箐大盜窟穴其間時時出肆焚劫值海寇犯江  
寧顛人騷然各洶洶思亂公密陳方略於上官擒盜魁一人誅海  
上謀者一人及城中姦民與盜謀者又一人而貫其餘黨顛人以  
靖上官方倚公如左右手而公念其父中憲公竟乞假歸矣自是  
里居將二十年性故廉介補衣素食怡然自適官吏不知公者或  
相凌侮亦置不校也中憲公服闋聞孫鍾元先生講學蘇門質驢  
往受業門下每質所疑先生亟稱之歸而所得益遂所行亦益力  
屹然推中原巨儒舉朝賢士大夫交口稱說以薦舉復起 御試  
甲等補翰林院侍講與琬輩同入史館充日講起居注官尋轉侍  
讀出典浙江鄉試還充明史總裁官既又直經筵纂修 兩朝聖  
訓公在 上前進退翔雅敷陳詳盡深契 上意超擢內閣學士

兼禮部侍郎遂以右副都御史巡撫江南陛辭之日 賜鞍馬綵  
緞白金五百兩繼 賜御書三軸諭曰展此如見朕也其眷注多  
類此江南故習豪侈而吳中尤甚服食玩好多不節又喜播博諸  
戲歲時婦女爭炫妝冶服嬉遨山水間以為常而市井無藉子率  
尚拳勇用鬪毆恐惕民財事憲即恃勢豪為囊橐不可究詰其尤  
無良者則鬻身旗下借以修故釁公悉禁止不少貸素多淫祠事  
楞伽山五通神尤嚴盛寒劇暑載鼓吹牲帛往賽禱者絡繹相繼  
姦巫淫尼闖入人閨閭競相煽惑吳人以是益困公廉得其狀躬  
至五通祠取土偶投諸湖中衆大駭久而又大悅服為政簡靜然  
下令期於必行賊吏蠹胥悉搖手屏足相戒不敢犯重修泰伯祠  
朔望必往躬謁又謁范文正公及周忠介公祠以為衆勸數親詣  
學宮命諸生講孝經俾幼穉悉得列坐以聽拊循細民若惟恐傷



之者吳俗自是大變雖窮邨僻壤莫不感頌其政里巷因公之姓至以諺語呼公清湯云公屢上疏訴吳人疾苦請改並徵積逋爲分年帶徵請捐十八十九兩年災欠請除邳州版荒田賦又請蠲明神宗朝所加九厘餉又請免淮揚徐水災諸州縣賦部議或從或否而公初未嘗憚煩也二十五年春有 詔擢禮部尙書掌詹事府事吳人空一城痛哭叩轅門留公不得則塞城闔阻公行又不得則遮道焚香以送者亡慮億萬人踰千里不絕及公渡淮乃已忌者覘知之愈益憾公 上遇公厚每會推會議必問湯某云何公亦感 上殊遇凡是非可否必侃侃正言不妄不撓忌者方力謀中傷顧未有以發而會五官臺郎董漢臣上書言十事語侵內閣或言漢臣本不知書有代草者御史受風指深文劾漢臣內閣擬 旨下部究主使 上乃命九卿更議衆咸欲抵漢臣罪忌

者逆沮公幸勿倡異論公曰彼應詔言事耳大臣不言將愧謝之不暇而忍周內耶因舉手自指心曰如此中何忌者大慙且憤所以誣鱉公萬端且摘公去吳時教令中語指爲示恩干譽於是公已患病竟爲讒言所中有輔導 皇太子之命公以病辭忌者欲藉是加罪 上不聽僅令回奏遂嗾廷臣交章劾公又不聽後先報聞而已先是公病思歸自以新被讒不敢請告乃薦前道臣耿公介侍 皇太子講筮以自代耿公老儒迂謹與舉朝不相得復嗾廷臣劾公所薦非是部議草職 上特寬其罰鍰五級留任猶不愜忌者意羣謀中傷益急公適聞太恭人病乃上疏乞暫歸省 上遣使齎手詔慰諭且欲賜第京師命公迎養公叩頭言母老萬不能來奏上有 旨不允公去當公之乞歸也忌者宣言 上怒將隸公籍旗下得 旨猶秘之急 召詣閣中公以病扶掖上



輿道路譁傳湯尚書入旗矣皆泣下而蘇松諸郡客都下者數百人並集鼓廳門將擊登聞鼓訟冤聞公還始散是時微 上保全公禍幾不測矣已而 皇太子見公羸瘠大驚曰先生果病至此耶越數日 命改工部尚書忌者勢不得騁更謀興大獄羅織公罪不數日而公病遂革方禍急時或勸公委曲請諸公居間俾稍解者公哂曰吾義命自安六十老翁尚何求哉或又勸公發忌者陰事以紓其禍公又曰吾有老母在未敢以此試也故士大夫咸以為難公平居潛心聖賢之學其於性命之淵微造化之精奧無所不探而一以誠正為本於古今之治忽事會之得失無所不綜而一以忠孝為先所撰洛學編一卷補睢州志五卷詩文若干卷琬在史館出入必偕藉公淬礪講論者甚至不知公於程朱何如以視真魏許姚諸儒則當出其上矣琬方請急亦嘗諷公以歸未

幾而公欲薦琬為明史副總裁自江南被 召又欲以宮寮薦琬固謝不可且曰願與公同其退不願與公同其進也琬長於公三歲訖今猶覲顏人間而公不可作矣每一憶公輒淚泫泫被面何忍執筆銘諸然琬惟以直諒為公所許倘不能白公之志而暴其受讒始末以示天下後世不幾負吾死友哉銘曰  
 猗湯屢遷輦與睢陽逮公之身彌久益昌為 國純臣為世儒碩道禰洛闡志宗稷益維吾 世祖拔公妙年起家內院付以大藩翩然引身潛蟄閭里 世祖儲之遺我 聖子入登侍從出拊江淮 帝念疲氓往哉汝諧再期政成遠蒙前席邁彼含沙伏機以射何交之泰而命之遭屢習於坎出險斯艱風雨露雷罔非 帝德 帝心簡在寧虞叵測生榮歿哀公奚憾焉天可必乎人定勝天黃岡之邱不騫不圯瘞是銘詩以埃良史



意爾谷間志宗賢益益  
 益益益益益益益益益益  
 受諸故末以示天可對世不幾育吾取文錯論曰  
 惡肆筆論前然來卦以直竊為公祖精論不謂自公之志而暴其  
 蕙詩令餅賄賤人間而公不可非矣每一獻公碑感其率姪而何  
 固構不可且曰齋與公同其歎不齋與公同其歎也齋身於公三  
 幾而公殆齋姪為即史隔縣姪自王南姪 曰又殆以宮寮齋姪

熊敬修先生傳

高芷生

先生姓熊氏諱賜履字青岳一字敬修號愚參楚孝感人其先南  
 昌人也由順治戊戌進士入庶常歷官東閣大學士既歿而 朝  
 廷隆禮師傅易名褒寵賜諡文端學者則皆稱敬修先生云先生  
 生而老成端謹垂髫時贈公弘毅先生手先忠憲遺書一編授之  
 曰東林為道學正宗吾少幸出學憲錫山高公門高公於忠憲為  
 猶子以得諸親炙者啟迪後學俾得粗有聞知兒曹能服膺是編  
 便是聖賢路上人也先生受簡再拜曰謹受教嗣後歷官禁近諸  
 所講述一本東林旨趣為宗其在閣學也 上嘗命講大學首節  
 暨中庸性道教等義先生敷陳愷切條對曲暢每發一言 上未  
 嘗不點首稱善後先生掌院事入直徑筵首舉尚書人心道心為  
 對其於理欲消長辨析毫芒一時感動 當宁同列咸嘆弗如曰



熊公真耆儒也東林書院之重修於潛菴湯大中丞也時先生適以讀禮僑居白門予偕兄節培竭蹶襄事事竣乞先生文以為記先生感門戶之糾紛懼道脉之凌替重以默識篤行為吾黨相勸戒且以口舌軋擊意見紛拏為當日影附東林諸公痛下針砭累累千言皆切於人心世道嗚呼先忠憲於明季力維正學砥柱狂瀾先生遭逢 聖明累侍講幄而持論醇正至欲并消蜀朔形迹此心此理易地皆然亦可見先生之私淑於東林者深而東林之流澤為遠且長也先生詩文雜稿所著最富其精力尤在學統閑道錄下學堂劄記三書今 皇上亦屢讀而嘉之至比之紫陽涑水且有將來配享文廟之褒寧止東林俎豆歟 並生 嗣守先業兢兢懼東林之廢墜幸先生之從祀於茲也用敢約舉先世遺聞略述其生平若先生之立朝大節豐功偉烈炳炳天壤不朽於千秋

萬世者自有 國史在

贊曰先大夫之督學三楚也嘗建濂溪書院首拔贈公弘毅先生俾主講席歸里後不遠千里時以所學相質證後遭流寇喪亂以守正不屈死曰吾不敢負梁谿之止水也非學有源本而就義如此乎敬修先生稟承家學以相 天子論道經邦弘濟萬物可謂有體有用矣其與贈公相繼並祀於東林也雖顯晦不同而後先濟美有以也夫



陸稼書先生傳 王材任  
國家重道崇儒德教翔洽端人正士後先輩出其粹然一出於至正  
為東南道學之宗者唯陸稼書先生一人而已先生諱隴其唐宰  
相宣公後浙之平湖人而粹清端嚴莊重不苟言笑孝友其天  
性也幼讀春秋傳過目不忘稍長博通經史慨然有志於聖賢之  
道於四子書章句尋復不厭不啻菽粟之於口被服之於身故其  
生平所成就皆本諸躬行實踐而其文章政事表見於外者又為  
士大夫所共知宜東南學者咸以為朱子之後斷推先生也年三  
十七舉於鄉又四年成進士授嘉定知縣縣瀕海難治先生潔已  
愛民力行節儉抑吏胥鋤豪右民俗丕變去官之日小民遮道攀  
號聲徹數十里不絕既不得請因刻木為主尸而祝之會左都御  
史蔚州魏公環極疏薦廉吏第一復原官再授靈壽縣先生力行

陸稼書先生傳

王材任

國家重道崇儒德教翔洽端人正士後先輩出其粹然一出於至正  
為東南道學之宗者唯陸稼書先生一人而已先生諱隴其唐宰  
相宣公後浙之平湖人而粹清端嚴莊重不苟言笑孝友其天  
性也幼讀春秋傳過目不忘稍長博通經史慨然有志於聖賢之  
道於四子書章句尋復不厭不啻菽粟之於口被服之於身故其  
生平所成就皆本諸躬行實踐而其文章政事表見於外者又為  
士大夫所共知宜東南學者咸以為朱子之後斷推先生也年三  
十七舉於鄉又四年成進士授嘉定知縣縣瀕海難治先生潔已  
愛民力行節儉抑吏胥鋤豪右民俗丕變去官之日小民遮道攀  
號聲徹數十里不絕既不得請因刻木為主尸而祝之會左都御  
史蔚州魏公環極疏薦廉吏第一復原官再授靈壽縣先生力行



東林書院志 卷之二  
教養條上六事請於上官民咸便之在任七年以左都御史澤州  
陳公說巖薦得行取邑民之泣而送者一如去嘉定時授四川道  
監察御史上疏論時政敢道人之所難言直聲震天下有與先生  
不合者先生遂改調歸屏居泖口閉戶讀書做廬數椽不庇風雨  
布衣蔬食惟以講學爲務門人弟子從之者甚衆未嘗見其厭倦  
也以康熙三十一年卒享年六十有三先生之學本於程朱謂不  
至敬無以立本不窮理無以致知又謂明之薛文清胡敬齋曹月  
川羅整菴朱子之正脈也此外則陽儒陰釋之學創爲新說叛道  
離經梁溪顧涇陽高景逸起而正之爲功於學者甚大嗚呼先生  
之於斯道也見之精故言之切造之深故辨之晰先生之爲功於  
學者更大矣先生始罷以薦得復用數年以薦得爲御史抗疏無  
所忌諱與會議持論侃侃未嘗少屈至有欲以深文中先生者賴

聖恩寬大曲爲保全歸田之後江南學臣缺

皇上獨念先生又欲起而用之而先生已不能待矣

皇上仁如天地明並日月宏開言路優容諫官扶植善類無所不至  
先生之遭遇可謂盛矣天不假之年未竟如此又士君子之所  
共惜也昔于清端公嘗告人曰天下清官惟陸稼書蔚州魏公亦  
謂余曰昔陸稼書云州縣親民之吏民間瑣細當爲分理若爲大  
吏惟虛公廉靜總大綱嚴責成其於事也多不如少少不如無與  
民休息而已迨余巡察直隸詞訟紛如見有情罪可惡者受而理  
之及按其事無一字實者而文移上下耽延時日兩造之身家俱  
不可問然後知稼書之教我者誠至矣余在吏部澤州陳公爲冢  
宰告同官曰今有志於學者必自羞乞墦賤壘斷始此陸稼書之  
言也願諸公共勉斯語耳夫三先生者海內所謂大賢也而居恒



議論必稱述先生使後學知所景仰益見善與善之相感也嗚呼俱不可及也已所著有三魚堂集問學錄松陽講義因勉錄讀朱隨筆及點定四書大全等書行世今東林後學請於濬川大中丞張公從祀於無錫之道南祠此非以道南之祀重先生也亦非借先生以爲東林重也特出於一時學者仰止之思不能自己而大中丞亦以爲非此無以慰學者之心欲世之目爲東林者皆學先生之爲人而後無愧其爲東林且欲後之從祀東林者必如先生之爲人而後無愧於從前之祀於東林者也一舉而數善備之矣先生之成進士也出吾鄉陳省齋先生之門故知先生甚悉乃次而述之且系之以論曰稼書先生之學朱子之學也由先生而溯之於二程則先生其世適也東林顧高之學亦程朱之學也由顧高而溯之於道南則先生其大宗也要其有功於斯道一而已矣

吳徽仲先生傳

施勳曾

吳徽仲先生諱曰慎號敬菴徽州歙縣人也生而穎異少好學未弱冠補弟子員始而從事舉子業江左文壇名望素著繼而潛心理學家貧甚盡隱金閭聞梁谿有高彙旃先生能繼顧高諸先生主壇講學於東林書院四方來歸因往遊焉從東林諸君子後虛心請益研求下學上達之旨析疑問難時出讜論載之紫陽通志後返故園益向學紫陽還古兩書院中會講不輟時則有胡匏齋汪惕若江默菴施虹玉諸先生共相討論悉守白鹿洞學規而弊繁則主敬以立其本窮理以致其知反躬以踐其實究其得力處尤在一敬字因自號敬菴學者宗之群稱爲敬菴先生蓋先生天資高邁於書無所不讀而其尋繹把玩終身不厭倦者則惟小學近思錄四書六經及濂洛關閩諸書迄今紫陽還古之間學者鬱



東林書院志 卷之十二  
起知所指歸者先生汲引之力居多大中丞考陽張公當令理學  
宗主也平日所傾心折服者惟先生偕汪默菴施虹玉兩先生著  
述且有殘編斷簡不可輕置之語嗚呼觀張公所折服於先生如  
此則先生之所以爲學槩可知矣予愧鈍根俗質浪游中外三十  
餘年未暇講求性命之學今老而歸田時與東林講會道南遺規  
猶在令人嚮慕之念不輟也嘗讀先生書竊嘆其義理淵深真足  
以分宋儒一席所著有周易粹言大學章句翼中庸章句翼已行  
於世其餘若周易翼四書翼周子太極圖翼西銘翼三十餘種因  
貧不能刻尙藏於家歲癸巳後學同人公舉先生主崇祀東林書  
院道南祠配宋儒楊文靖公龜山先生永饗祀典云

汪默菴先生傳

陳鵬年

文學汪先生諱璩字文儀號默菴新安之金城里人也系出周魯  
成公子汪侯而分派則自唐開國鐵佛公始代有聞人歷傳至文  
學穎悟過人十齡通經史大家然不屑事俗儒章句而惓惓於韓  
之原道年十六卽手錄理學諸書潛心體認可謂聞道甚早矣性  
孝友色養其尊人鄉賓惟晦公繼志守身貽親令名丁內外艱哀  
毀骨立行道傷之以弟歿憂勞成咯血症越四十餘年復爲其季  
病且歿兩發舊疾幾憊人服其至性近世希覯少遭喪亂家中落  
兼治生以佐甘旨贍仲季而一燈午夜雖祁寒暑雨終其身弗稍  
懈中年僦居漢陰因占籍中楚文譽日噪不十年棄去淡如也惟  
力於躬行一言一動必秉成法身修教成庭內肅然生平樂與善  
而不妄交所師友者錫山高彙旃先生吳趨徐侯齋先生及同里



江石樵葉簡崖數會友而已故高彙翁先生寄詩有曰遊吳握手皆奇士還里論心有碩儒蓋紀實也於憂患中以讀易求寡過之旨故所著有質疑二十卷凡八易藁而研究愈精孝昌熊文端先生亟稱之曰足下辯志既勤衛道復力立言端以洛閩爲宗而其才又足以發明之故詞旨明晰發前人所未發大有功於四聖近大中丞濬川張公序之曰力學篤行道宗孔孟理本程朱其實地發明處都從身心體驗吾知大易真詮自伊川紫陽而還汪子分一席矣其見重於有道如此又有語餘謾錄文集悠然草詩集儀典堂文錄大學章句釋義周易補註便讀月課問答各若干卷其他校錄評選前賢書甚富或行於世或藏於家皆可垂諸不朽者年七十四卒疾革之前數日仍手答吳門蔡九霞論格物致知之義闢異說闡正學娓娓數千百言則生平之所養可知也已有子

名鈞字隣石食餼有年能世其家學

贊曰予少與隣石同庠得拜先生于漢寓密窩儀範嚴肅望如山嶽及聆其聲咳談論如累日坐春風中不忍去也尤善言易每與予反覆於吉凶消長進退存亡之道不啻三致意焉後予令西安猶寓書敦勉進予以古之循吏意氣固已勤懇矣今先生歿名愈尊道愈顯雖未少見諸設施而著述弘多皆大有關於名教開示來學蓋彬彬質有其文醇儒之業不徒稱獨行君子云



施虹玉先生傳

秦源寬

先生諱璜字虹玉號誠齋徽州休寧人幼凝重寡言笑塾師即心異之年舞勺已通孝經小學四子書稍長事制舉業應試過郡見紫陽書院中有講學者先生諦聽身心性命之緒論遂恍若有所得喟然曰學者當如是矣舉業非吾事也遂絕意仕進發憤潛修卒以理學著稱云其為人以古道自處而一生得力尤在誠信兩字每謂吾儒以誠守身以信應物自然內外交修而學始立其為學以宋儒程朱為的兼于濂溪橫渠及明河津餘干泰和諸子之書無不日夜精研晰其同異辨其源流而得其指歸所在其講學也在新安紫陽還古兩書院每月會講皆首推先生主講席先生必先期齋戒肅衣冠歛容止危坐正論儼然以一身當嚴師益友而於先儒語錄尤多所發明能使聽者疊疊忘倦以故四方學者



翁然宗之其來遊錫山也以康熙壬子歲時鄉先生前楚學憲彙  
旃高公以忠憲公猶子主持東林書院先生負笈遊學歷吳越遡  
梁溪登東林講堂慨然有吾道復興之志以彙旃先生實得忠憲  
公家學淵源遂執贄行師事禮高公固雅重先生每會輒推爲祭  
酒先生亦直任不辭其立法引掖後進也九容以養其外九思以  
養其內九德以要其誠而所尤諄切者惟以修身立誠深相策勵  
學者佩服景行一如在新安時其所著有思誠錄每日以存何念  
接何人行何事讀何書吐何語五者自勘座右大書毋自誣誣人  
毋自欺欺人以示警更有小學發明五子近思錄發明兩書皆行  
世最著者先生功在理學五十餘年而沒沒後十餘年諸同人公  
舉祀先生於東林道南祠先生之學益以大顯余雖不獲見先生  
而少時猶及事內祖學憲高公卽耳熟先生名學憲公諸孫函三

幼卽侍東林講座習見先輩典型最心折先生者謂先生旣已配  
食先儒矣不可無傳因縷述平生品概而屬予傳之如此抑又聞  
之東林故老云先生始來會講也臨別時與高公約以某年月日  
必赴講及期高公設榻以待或謂公曰遙隔千餘里安能必施君  
之果如約耶公曰不然施生篤行君子也如失期不來者吾不復  
交天下士矣言未竟先生果携其子擔囊而至論者謂非高公不  
能信先生非先生不能取信於高公以此兩賢之至今傳爲講堂  
佳話嗟乎重然諾矜期許此風今已渺然矣必誠必信如先生者  
真古人哉真古人哉

東林書院志

卷之十二

三







聖祖奇其才未踰年擢都察院右副都御史巡撫江西舟抵江寧而聞夏逢龍之亂時賊連破蕪黃左右二十餘城避兵者蔽江下無一人西者衆懼議緩行公曰兩省地聯一江無撫臣彈壓慮且生變疾抵至湖口偵知會城遣撫標兩校出師托言無餉不發意頗叵測立檄稅庫銀千兩委道員往諭之省中標兵單弱人情恇怯公至鎮以無事有告變言裁軍李美玉袁大相密謀聚衆應賊者公佯不省而陰授遊擊趙永吉方略夜縛二渠至立斬之縣其首章江廣潤兩門餘悉不問衆乃大定會夏逆亦殄江省素凋敝又新遭震驚公先條除病民者十數事黜貪吏之甚者宿賊巨猾皆名捕正法江西遂安三十一年命仍以故官調撫江蘇江南承平久士民愛尚文雅公遂弛威嚴以清靜無爲爲治吳故有蘇子美滄浪亭公至葺其遺趾暇日招文士觴詠其中修無錫道南祠一切細務循舊章治之無所更作而下亦莫有犯者在職十有四年歲豐人和獄盜衰息屢逢

聖祖

溫語褒獎至解所御冠袍賜之屢次乞身不允最後抱小疾命遣御醫診視隨名爲吏部尙書公少侍文康公於京邸熟練掌故到吏部人不能欺無敢亂銓法者四十七年以衰病乞歸臨行慰勞再四并詢江南盜賊事公對愚民無知惟早具獄可免株連

聖祖是之五十二年三月

聖壽

六旬公赴闕恭賀以先朝舊臣誥授光祿大夫特加太子少師公自歸田後治西陂老圃日與故人子弟分韵賦詩故晚又自號西陂居士云



許時菴先生傳

高 隆

先生諱汝霖號時菴浙之海寧人也康熙辛未先生視學江南敦  
士習弘文教悉以實心行實政其校士也謂國家設制義取士上  
以闡聖賢大義微言下以覘士人立心制行歲科試牘非體認傳  
言精實談理者悉屏不採故事學使下車輒集諸生學宮命講五  
經四子雖循例奉行祇爲具文而先生與子言孝與弟言弟窮經  
學之淵源晰諸儒之同吳諄復指誨無少厭倦而大江南北沐先  
生之教僉以經師人師目先生焉東林之在錫也實爲東南講學  
一大區會自先忠憲公於前明萬曆偕涇陽顧端文先生昌明正  
學天下響應沿至先生視學棟宇之弗治久矣諸生之習禮闕如  
先生再臨講舍兩捐俸金新堂廡以妥先賢延耆宿以造後進慨  
然欲重振斯席以繼往哲而開來學尋以任滿還朝而罷士林憾



東林書院志 卷之十二  
之先生自爲諸生卽以文章學問推其鄉祭酒年四十餘登第入  
詞館其視學江南也以贊善出最後爲大宗伯予告家居以康熙  
庚子冬卒於海寧之里第訃聞三吳人士皆爲位哭越明年辛丑  
請於學憲鄭公以某年月日配食宋龜山楊先生祠成公志也隆  
故先生拔補博士弟子方今觀察刁公邑侯胡公增志東林謹撫  
拾萬一爲先生傳不勝泰山梁木之感焉

張孝先先生傳

華希閔

張清恪公名伯行字孝先號敬菴河南儀封縣人天性樸誠少卽  
潛心理學墨守程朱成康熙乙丑進士初授中書舍人丁外艱回  
籍戊寅夏大雨水泛溢募民夫囊沙築堤邑賴以安遂寧相張公  
督河薦公効力河工監修南岸堤工護馬家港東壩修高家堰蝦  
鬚溝河並著勞績再以河督疏薦授山東濟寧道濬運河導南旺  
水北注吏計稱最遷江寧按察司使蒞任數月

聖祖

仁皇帝南巡召見 特擢右僉都御史巡撫福建時福建歲歉斗  
米錢四百公至遣官買米平糶又多置社倉以脩積貯米值驟減  
閩人咸飽公德永安大田等邑無賴竄伏深山中煽惑愚民公設  
法撫其豪餘黨遂散福州向多淫祀悉除去贖貧家女髡爲尼者  
數百人撫標舊多空糧爲家衆地悉募丁壯補足之建鰲峰書院



學舍百二十楹祀有宋五子選閩士之秀者肄業其中數詣書院  
勗諸生以正學士子蒸蒸向風尤以褒廉吏糾貪墨爲急旋移撫  
江蘇首葺東林書院躬詣講學剖論朱陸異同娓娓不倦江南頻  
歲災侵上疏請賑高郵等十三州縣暨徐州乏食軍民多所全活  
又請暫緩江蘇等屬帶徵災漕上發帑平糶疏皆得 旨允行江  
南人之戴公者較閩更甚會江督噶禮與公素不相能辛卯科場  
事起劾總督營私壞法督勢張甚馳疏互劾遂寧相以司農奉  
詔質審

聖祖

盡得其情 特諭張伯行天下第一清官着留任噶禮革職江南  
士民莫不手額相告時奉 旨會察戰艦條陳分別營哨商漁舟  
編立號數奸無所容尋以張令濤一案遂寧相以豕宰再至江南  
質訊遽解公任案成入 告蒙 俞旨着公隨豕宰赴京 召見

特命署理倉場總督事務越二年奉 旨管理錢法尋晉戶部  
侍郎仍兼倉場總督

今上元年以公年老准解倉場專理部務八月陞禮部尚書議

皇太后祔廟禮定耕藉禮儀追封 先聖五代諸大典多出公手乙巳

二月既望公卒

上聞軫悼 命鎮國公奠茶酒 賜祭葬贈太子大保謚清恪公生  
平持已極嚴待人甚恕見之者如坐春風中素慕平湖陸侍御隴  
其推爲敬軒整菴以後一人雍正二年廷議從祀孔廟公實主之  
嘗定大學改本所著有正誼堂文集居濟一得困學錄公既歿之  
三年河督田公疏請特祠東林學子請於江撫張公從祀書院之  
道南祠



張菰川先生傳

秦松齡

先生諱夏字秋紹常之無錫人也隱居菰川之上因自號菰川少  
有至性篤孝友力學馬文肅公見而器之遂爲入室弟子焉有文  
名郡守山左宋公會五邑士子於龍城書院拔置第一屢試白下  
數奇不售乃棄舉子業潛心理學學以朱子爲宗自高忠憲周蓼  
洲諸公竝罹黨禍人人目東林爲畏途而先生信道愈篤守道愈  
嚴洎乎 昭代定鼎後學憲高彙旃先生暨家弱水先生始議修  
復東林學舍四方之士來遊者雲集響應春秋釋菜畢入講堂與  
吳徽仲汪默菴施虹玉諸君子次第講學往往推先生倡首先生  
升堂卽席容止肅穆衣冠儼然每監一議必原本六經參以心得  
往復回環極盡理趣湯潛菴撫吳至東林會講與先生上下議論  
輒首領之因延至吳郡學宮講孝經小學一時環橋觀聽者無不



人人感動玉峯趙公繼之復設講座以禮請折節致敬僉謂東林有人蓋東林自彙旃高先生卽世三十餘年講席不盡廢者以先生爲魯靈光也按先生平日束躬勵行重規疊矩篤守居敬窮理之學不爲他岐所淆亂讀書靜坐老而不衰接引後學先經後史條理秩如於經尤精易詩春秋自湯中丞延講孝經旋有孝經解義其說一遵先儒而旁通曲暢使讀者悠然有會於訓詁之外小學則有淪註後生群誦習焉於十七史俱精熟而諸家記載亦博覽強記凡先代典章沿革前賢軼事家世譜牒歷歷道之如貫珠如指掌近修通省郡邑三志莫不受成焉尤究心先儒遺書於宋元明諸賢靡不考其師承採其要旨著洛閩源流錄有功聖學甚大殘編蠹簡寤寐訪求手蹶親抄率多秘本邑中藏書家不逮也爲文淵博詳贍成一家言爲詩真率可喜不假粉澤四方請乞者踵至倚侍立應未嘗厭倦嘗書座右云治此心須是刮垢磨光潔潔淨淨生斯世要如臨深履薄戰戰兢兢又云思狂思狷思中行最怕落他鄉愿一徑戒色戒鬪戒苟得常防過此物欲三關此可以知先生梗概矣卒年八十有六著述甚富不能盡刻其五經四書述朱解孝經問業小學淪註洛閩源流錄悉行世云



高紫超先生傳

顧棟高

先生姓高氏諱愈字紫超忠憲公諱攀龍之兄孫也父諱某先生資稟異凡兒五歲聞兩兄讀書聲卽牽衣請入塾授書便成誦十歲讀忠憲遺書慨然有志於聖賢之道年及壯補弟子員旋食餼試輒壓其曹而先生居恒絕不作帖括文字日從事聖賢遺經及程朱性理諸書五十外足不踏省門閤然以明經老邑中士大夫至不敢以字稱咸稱之曰先生云先生行完氣和充養有道內行純備其自處極潔一毫不以取于人及與之居退然而溫以和雖庸夫小童莫不自謂先生親已也先生父晉侯公性素豪豪于飲先生事之委曲承順食必具酒肉及與人飲先生遣僮使往候已則屏伏路側俟與主人拱揖別則趨迎扶攜以歸數十年不易母歿泣血三年不飲酒食肉內寢逮晉侯公年八十九以終先生年



五十餘矣執禮一如喪母時先生兩兄皆早世伯兄子宥而遨遠出數年不還先生裹糧走數百里訪得之天寒雨雪兄子單衣慄甚出衣履服之載以歸方謀爲授室忽又出求之不獲先生乃析產爲三授仲兄子令王其祀嫁伯兄女撫仲兄二子如子婚娶之費一皆出先生時先生饘粥不踰數十畝藉脯修以養恒日闕無儲先生夷然不以屑意也歲己未旱庚申大水水流室中尺餘先生姊妹攜男女來就食先生皮版爲高閣令諸人坐其上雜豆爲飯共食之歡然而樂先生教人不爲嚴厲務以身化雖子弟未嘗見其有疾言遽色人有忿爭者至先生前自慙汗愧屈而先生與語若唯恐傷之某嘗從先生遊見先生講說經義娓娓忘倦至食時則爲置食閒雜以酒殺雖盡歡未嘗有譁笑聲終日不欠伸跛倚卽當空乏時清坐相對和氣溢眉宇退而猶有餘味也先生旣不問家有無所得輒緣手盡晚年困益甚嘗茹粥七日先生方挈其子登城眺望若有所得親故有遇者見先生貌益充嗚呼先生之所養可知已儀封張大中丞撫吳檄無錫縣延先生主東林講會先生方病瘍不時往邑令餽以參餌謝不受先生爲學不尙議論惟致力于謹言慎行飭躬踐履間嘗舉孟子志士不忘在溝壑爲訓謂貧士自立必從此始故其生平自少至老守此不易邑人有以道學相笑侮者至先生獨無詆訾咸呼曰君子君子云年七十有八卒先生和易中有嚴介信道甚篤家不用祈禳治喪不作浮屠佛事一子痘瀕于危家人咸請禱于神卒不往竟亦無恙完養極密盛暑不裸體跣足與人食不越簋下箸終日晏坐一室于經書無所不窺尤深于春秋周禮儀禮周禮稿凡數十易今有周禮註及小學纂註字母諸書藏于家



林平華先生傳

陳鼎

林宰字德衡福建漳浦人萬曆辛丑進士授無錫縣令蒞任後適東林方興講學遂捐復講堂其後重建道南祠成又為之記其略曰宰維吳地自讓王篳路而來季子歌風言游禮樂斌斌號文學之國矣中更六朝五季剝蝕於談塵榛蕪於戎馬非先生正學南來五百年墜緒何以昭茲來許顧或謂南宋道學空談無用宰按先生策燕雲之師則云宜退守汴京不可虛內示外金人內寇則云宜堅壁清野潛遣援兵追襲至於三鎮不可棄和議不可從責金人敗盟問肅王使必復而後已種種石畫皆熟諳情形事變深於兵家者之言此真有用道學豈與爭機鋒而渺功實者埒也或又以其辟應蔡京為疑不知先生鴻才鉅識行權濟時正善學二程而融之使其志得行於靖康建炎間則女直可無南窺二帝可



無北狩一祖六宗之業可無偏安江左奈之何阨於權奸不究其用以殉此諸君子所謂扼腕太息而欲宰之論其世也歟自東林復振後每月主會遇當道憲長四方賢哲皆一軌於禮其有心衛道如此至先後試士拔馬世奇華允誠爲第一稱水鑑云其加意人文又如此凡民間有事剖斷如流按律得情吏胥不得上下手去任後民思之曰安所得林青天哉其得人心又如此官歷部曹至南京兵部侍郎卒學者稱平華先生後逆璫毀書院見宰碑記遂入東林榜中削奪崇禎改元乃復

曾二雲先生傳

明史稿

曾櫻字仲含峽江人萬曆四十四年進士乞假歸師事鄒元標久之授工部主事歷郎中天啓二年稍遷常州知府諸御史巡鹽倉江漕及提學屯田者皆操舉劾權文牒日至櫻牒南京都察院曰他方守令奔命一巡按獨南畿奔命數巡按請一切戒飭罷鈞訪取贖諸陋習都御史熊明遇爲申約束焉櫻持身廉爲政愷悌公平不畏強禦屯田御史索屬吏應劾者姓名櫻不應御史以危言恐之櫻荅曰僚屬已盡無可糾止知府無狀因自署下考杜門待罪撫按亟慰留乃起視事織造中官李實劾罷巡撫周起元迨知府行屬禮櫻獨如故實怒移檄以爾汝侮之櫻亦報以爾汝卒不屈無錫高攀龍江陰繆昌期李應昇被逮櫻助昌期應昇貲而經紀攀龍死後事出其子及僮僕於獄爲文祭之宜興毛士龍坐忤



魏忠賢遣戍櫻諷士龍逃去上官捕其家人賴櫻以免武進孫慎行忤忠賢當戍櫻緩其行忠賢敗事遂解七年遷浙江右參政用士民請詔以新秩留任崇禎元年以右參政分守漳南九蓮山賊犯上杭櫻募壯士擊退之夜搗其巢殲賊殆盡士民爲櫻建祠母憂歸服闋起故官分守興泉二郡進按察司分巡福寧先是紅夷寇興泉櫻請於巡撫鄒維璉用副總兵鄭芝龍爲軍鋒果奏捷及劉香寇廣東總督熊文燦欲得芝龍爲援維璉等以香與芝龍有舊疑不遣櫻以百口保芝龍遂討滅香芝龍感櫻次骨十年冬東廠獲一男子言爲櫻行賄謀遷浙江按察使詞連吏部主事林中鳳來方燁帝怒下兩人獄命撫按械櫻赴京御史葉初春先爲櫻屬吏知其廉於他疏微白之有詔詰問因具言櫻賢然不知賄所從至詔至閩巡撫沈猶龍巡按張肯堂閱廠檄有奸人黃四臣名

芝龍前白曰四臣我所遣我感櫻恩恐遷去令從都下訊之四臣乃妄言致有此事猶龍肯堂以入告力訟櫻寬芝龍亦具疏請罪士民以櫻貧爲釀金辦裝耆老數千人隨至闕下擊登聞鼓訟寬帝命毋入獄俟命京邸削芝龍都督銜而令櫻以故官巡視海道未行楊嗣昌以衡永多寇奏改櫻湖廣按察使兼右參政分守湖南給以勅故事守道無勅帝特賜之時賊已殘十餘州縣而永州知府推官咸不任職櫻薦蘇州同知晏日曙歸德推官萬元吉才兩人方坐事罷官以櫻言命日曙以同知掌知府事元吉以檢校掌推官事櫻乃調芝龍勦賊賊多降一方遂安遷山東右布政使分守登萊十四年春擢右副都御史代徐人龍巡撫其地明年遷南京工部右侍郎乞假歸山東初被兵巡撫王永吉所部濟兗東三府州縣盡失匿不以聞及兵退以恢復報而櫻所部青登萊三



府失州縣無幾盡以實奏及論罪永吉反擢兵部侍郎總督薊遼而櫻奪官逮治下刑部獄不十日而京師陷賊盡釋諸囚櫻乃微服遁還自詣南京刑部時福王已立法司當以贖徒唐王稱號於福州鄭芝龍專柄薦櫻起工部尚書兼東閣大學士無何令掌吏部而移吏部張肯堂於都察院櫻持法不撓數有所執爭薦揭重熙傅鼎銓等皆擢用櫻尋進太子太保吏部尚書文淵閣王駐延平令櫻留守福州

大兵破福州櫻挈家避海外中左衛越五年其地被兵遂自縊死

東林書院志卷之十二終

東林書院志卷之十三

祀典

流澤在人饗以俎豆禮也學者得以俎豆之事習禮于斯觀感興起弗可替也在官之祭則於以見著令之有加隆焉志

祀典

古有釋菜釋奠之禮釋菜行于孟春而禮簡釋奠四時可行而禮煩今制學宮之祭每歲于春秋仲月上丁日行即古釋奠也本祠之祭酌古準今而權煩簡每歲于正月上甲日行釋菜禮春秋仲月仲丁日行釋奠禮

釋菜儀注

前三日齋戒前一日宿院中

先師前設爵三

旁二爵先酌酒籩豆各二二豆在中盛菁菹兔醢

中爵待獻官行



免則以至日夙興主祭者與陪祭俱吉服  
魚醢代 陪祭者各就位 主祭者就位 瘞毛血 迎神鞠躬拜 興

拜 興 拜 興 拜 興 平身 行獻禮引贊 詣盥洗所

詣酒尊所 司尊者舉冪 酌酒 詣

先師孔子神位前 跪 獻爵 俯伏 興 平身 詣讀祝位

跪通贊 陪祭者俱跪引贊 讀祝通引 俯伏 興 平身 復位

通贊 送神 鞠躬拜 興 拜 興 拜 興 平身 禮畢

祝文曰惟年月日末學某等敢昭告於

至聖先師孔子惟

師祖述堯舜憲章文武上律天時下襲水土如天地之無不持載 無不覆疇如四時之錯行如日月之代明茲當東林書院一歲

講習之初恭修釋菜之禮尚 饗

同日

楊龜山先生神位前設爵三旁二爵先酌酒 籩豆各二二豆在中

醢二籩在兩旁盛棗栗

七先生神位前每位設爵一分獻 每案設籩豆各二如前 執事

者各就位 陪祭者就位 主祭者就位 迎神 鞠躬四拜

興 平身 行獻禮引贊 詣盥洗所 詣酒尊所 司尊者舉

冪酌酒 詣

楊龜山先生神位前跪 獻爵 俯伏 興 平身 跪通贊 助

祭者皆跪引贊 讀祝通引 俯伏 興 平身 復位引贊 分獻

者詣

七先生神位前 跪 獻爵 俯伏 興 平身 復位通贊 送



神 鞠躬四拜 興 平身 禮畢

祝文曰惟年月日末學某等敢昭告於

宋楊龜山先生之神曰惟

先生倡道東南至止錫邑十八年儀刑儼在五百歲道化如新茲

當東林書院一歲講習之初恭修釋菜之禮謹以

仲素羅先生

德輝胡先生

玉泉喻先生

遂初尤先生

小山李先生

實齋蔣先生

二泉邵先生配尚

饗後來續進顧高諸先生司祝文者宜于臨時一昭此例宜讀

釋奠儀注

先三日齋戒前一日宿院中午後省牲用羊豕各一以全牲獻

聖廟主祭者恭揖而退毛血用盤盛待次早瘞

先師前設爵六三盛酒登一大羹猪肉汁鉶二和羹汁用簠二黍稷

二稻籩八形鹽藁魚棗栗不用鹽醬豆八菜菹切去本末取中四寸菁茹

熟之和鹽酒料物糗餅用魚醢細切魚熟之和糕俎四羊首一猪首一羊

帛一 酒尊一

至日夙興主祭者與陪祭者俱吉服通贊執事者各司其事

陪祭者各就位 主祭者就位 瘞毛血 迎神 鞠躬拜

興 拜 興 拜 興 拜 興 平身 行初獻禮引贊

詣盥洗所 詣酒尊所 司尊者舉冪酌酒 詣

至聖先師孔子神位前 跪 獻爵 奠帛 俯伏 興 平身



跪通贊陪祭者皆跪引贊讀祝同唱俯伏興平身復位

行亞獻禮通贊詣酒尊所司尊者舉羃酌酒詣

至聖先師孔子神位前跪獻爵俯伏興平身復位

通贊行終獻禮引贊詣酒尊所司尊者舉羃酌酒詣

至聖先師孔子神位前跪獻爵俯伏興平身復位

通贊飲福受胙引贊詣飲福位跪飲福酒受胙俯伏

興平身復位興鞠躬拜興拜興平身徹饌

送神鞠躬拜興拜興拜興拜興平身

讀祝者捧祝進帛者捧帛各詣瘞位望瘞引贊詣望瘞

位焚祝帛訖通引祝文曰某年歲次甲子某月甲子朔越某日甲子末學某等敢昭告于

至聖先師孔子惟

師祖述堯舜憲章文武上律天時下襲水土如天地之無不持載

無不覆幬如四時之錯行如日月之代明惟春謹以牲帛禮秋

齊粢盛庶品式陳明薦尚饗

同日

楊龜山先生神位前設爵三登一劍一簠一簋一籩

六形鹽藁魚棗豆六葑菹菁菹芹菹魚醢帛一俎四二俎盛羊肉

七先生神位前設爵七東西劍各一簠簋各一籩各四棗

實栗茨豆各四葑菁俎各二羊蹄一通贊唱各就位迎神鞠躬

四拜興平身奠帛行初獻禮引贊詣盥洗所詣酒

尊所司尊者舉羃酌酒詣獻帛俯伏興平身跪

楊先生神位前跪獻爵獻帛俯伏興平身跪



陪祭者皆跪引贊讀祝同唱俯伏 興 平身 復位引贊分

獻者詣

七先生神位前 跪 獻爵 俯伏 興 平身 復位通贊行

亞獻禮如前。通贊行終獻禮如亞獻禮。通贊辭神 鞠躬四拜 興

平身 讀祝者捧祝 進帛者捧帛各詣瘞位望瘞引贊詣望

瘞位熱祝帛訖同唱禮畢

祝文曰惟年月日末學某等敢昭告於

宋龜山楊先生之神曰惟

先生倡道東南至止錫邑十八年儀刑儼在五百歲道化如新茲

當仲春秋敬舉時祭謹以

仲素羅先生

德輝胡先生

玉泉喻先生

遂初尤先生

小山李先生

實齋蔣先生

二泉邵先生配尚

饗自今以後讀祝文例見前

釋菜祭物

聖廟棗一觔 栗一觔 菁菹一束 魚二觔 酒一瓶 香燭

一副

道南祠棗三觔 栗三觔 菁菹一束 魚三觔 酒二瓶 香

燭三副

釋奠祭物

聖廟猪一口重若干觔 羊一羴重若干觔 帛一段 黍稷

東林書院志

卷之十三

五



稻梁 形鹽 藁魚 棗 栗 榛 菱角 芡實 柿 蕪  
 菹 菁菹 菜菹 芹菹 笋菹 醢醢 魚醢 糗餅 粉  
 餐 酒一瓶 香燭一副

道南祠猪羊分用 帛 黍稷 稻梁 形鹽 藁魚 棗 栗  
 榛 芡實 蕪菹 菁菹 芹菹 笋菹 醢醢 魚醢 酒  
 二瓶 香燭三副

以上係劉本孺先生志草原文

官祭緣起

江南常州府無錫縣儒學生員施揚曾顧弘烈高肇升華燦張夏  
 等呈為大道欣邁中天先儒再得此日公懇憲頒官祭以崇理學  
 事竊惟吾道南矣前賢知正學之有歸斯文在茲後代卜天心之  
 未喪豈廟貌千秋不毀而官祭一日未邀幸逢關閩之代興永勒  
 春秋之崇祀伏觀宋朝楊文靖公龜山先生道南祠在無錫縣城  
 東隅係十八載流寓之舊區為五百年講習之公所載在志書稱  
 為古蹟自顧高兩先生繼講席而虔修灌獻得歐林諸守令因共  
 事而敬薦蒸嘗是則當日之私祭即當日之官祭也逮魏璫拆毀  
 書院惟此祠不改舊觀然沿至今日而官祭竟湮矣恭遇 太宗  
 師老大人 心契西銘道隆北學三才合撰興禮樂以輔佐太平八  
 代起衰立德功而並垂不朽所以吳風丕變窮鄉習衍義之書因



之宋庶再新下士識崇儒之要不愧同風千里洵稱曠代一時今有文靖十八世孫生員楊惟植德行允孚于閭里孝思彌篤于家庭捐產葺祠備員奉祀朝夕瞻依旦明對越詠世祖清芬之澤徵憲天育化之隆但念有崇祠無官祭未免愴懷且謂援常郡比錫山尚爲缺典伏乞 太宗師老大人表章先儒興起後學批昭毘陵道南祠事例令有司春秋致祭著爲令甲庶幾風高立雪國家無不舉之禮文兼且化洽橫渠草野有聿修之經術矣爲此連名具呈須至呈者 順治十六年二月二十六日

江南常州府無錫縣儒學爲大道欣邁中天等事蒙 欽差提督江南淮揚蘇松等處學政提刑按察司僉事張批發本學生員施揚曾顧弘烈高肇升等呈詞前事奉批開龜山先生有崇祠而無官祭殊爲缺典仰學照例速議詳奪等因蒙此遵依查得宋儒楊

文靖公龜山先生流寓錫邑十有八載紹興末公之孫航以樞密院編修轉常州添差通判遂占籍錫之垂慶鄉子孫世居焉其祠于茲土宋元以來尚矣其地向爲庵僧侵沒賴顧高兩賢出善價購贖而祠得復存後爲魏璫撼搖幸忠憲義僕執志書力爭而祠得不毀當講學之日撫按分司頻來拜謁郡守邑侯共事趨躒此官祭之所以不待請也自哲人云亡廟貌寂寞近有文靖公系孫奉祀生員楊惟植棲止祠旁勉修講習邑中子弟莫不欣蒸固本生誦芬咏烈之思寔皆憲臺一道同風之效不有官祭曷昭大公此生員施揚曾等之所以公請也龜山先生之宜有官祭旣不待言而錫邑道南祠係十八載講習之故宮尤千百年精氣之所聚春秋禮祭又何疑乎祠中諸從祀皆宋明以來大儒或受業于及門或私淑于後世各有羽翼之功無忝馨香之配并合開列姓氏



同祭文粘單報明

江南常州府無錫縣儒學為大道欣邁中天等事承准本縣故牒該蒙 欽差督學道張批發本學呈詳生員施揚曾顧弘烈高肇升等呈舉楊龜山先生官祭緣由奉批開道南祠應官祭以崇祀典仰縣查照典例行此繳等因到縣奉此行文牒學即便遵照憲批事理查照典例具由呈縣候覆施行等因承此該本學會集生儒議得理學宗風不墜惟賴表揚先賢教澤常新敢弛報祭故周元公之祭于濂溪祭于九江與朱文公之祭于婺源祭于建陽不一而足皆地方之光而典章增重者也今東林之有楊龜山祠寔與元公文公各處崇祠相埒宜遵炤本邑崇正書院祭品禮儀兩丁奉祀擬撰祭文一篇恭候裁定施行

維

順治歲次

月朔

越

日丁

知無錫縣事黃之

蔚等謹致祭於

宋先儒楊文靖公龜山先生之神曰先生之學繼程啓朱先生之文超歐軼蘇惟是東林神靈所都一十八年來誨吾徒未發氣象無欲功夫吾道南矣其在斯乎茲當春秋丁敬行禴祭謹以

|       |       |       |       |
|-------|-------|-------|-------|
| 仲素羅先生 | 德輝胡先生 | 玉泉喻先生 | 遂初尤先生 |
| 小山李先生 | 寔齋蔣先生 | 二泉邵先生 | 筠塘陳先生 |
| 啟新錢先生 | 涇陽顧先生 | 靜餘許先生 | 涇凡顧先生 |
| 玄臺薛先生 | 閒適葉先生 | 弦所張先生 | 景逸高先生 |
| 我素安先生 | 覲華吳先生 | 經畬鄒先生 | 本孺劉先生 |
| 仁寰宿先生 | 水菴秦先生 | 訥菴華先生 | 素修馬先生 |
| 幾亭陳先生 | 鳳超華先生 | 仲馭周先生 |       |



配尚

東林後學錢肅澗高菴生顧曰驥等呈為祀典遵批釐正後學永藉生成懇賜申飭振新以復舊觀以彰文治事東林書院道南祠崇祀肇稱夫文靖學統特著夫顧高前賢倡而後賢隨講會開而文會起月旦既本大公典章悉遵舊制肅澗等上年十一月十六日具呈憲轅蒙批與同學先達碩儒共相討辨釐正澗等感佩天恩約同郡縣先達公同議得在祠諸賢久經祔祀難分彼此自應一體補復位次如江右南臯鄒公為東林前輩金沙景素于公為道南功臣並當增入以光正學已擇本年正月上元日迎進二月十一日仲丁釋菜顧高後裔相同講習如初理合報明又上年九月先蒙大憲臺給示內開前賢絃誦之區如有師儒生徒銳志聖

賢不妨講習其中因于講會之外復聯文會勤行督課可柰書院荒頽多就傾圮會逢大憲臺內名總憲若乘此日振新洵是千秋盛舉伏乞憲恩批飭通屬所司及時修葺加意護持庶棟宇煥新咸仰作人雅化規模整舊群瞻衛道洪庥將自一邑而徧三吳彬彬開文治之盛且由一時而傳千古永永頌令德之垂先儒叨庇實深後裔沾恩亦靡量矣為此上呈

康熙二十三年三月日呈總憲余

道南崇祀先儒位次

主位

宋文靖龜山楊先生諱時南 劍將樂人

配位

仲素羅先生諱從彥 南劍人 德輝胡先生諱理 毘陵人



玉泉喻先生 諱 人居 無錫 樗 祥符

小山李先生 諱 無錫 祥

二泉邵先生 諱 無錫 寶

涇凡顧先生 諱 允成

以身薛先生 諱 敷教

本孺劉先生 諱 元珍

元冲李先生 諱 復陽

静餘許先生 諱 世勳

景逸高先生 諱 攀龍

閒適葉先生 諱 茂才

宜諸歐陽先生 諱 潛江 鳳

念臺劉先生 諱 宗周 山陰人

遂初尤先生 諱 無錫 表

實齋蔣先生 諱 重珍

涇陽顧先生 諱 憲成

啟新錢先生 諱 一本

我素安先生 諱 希范

懷魯周先生 諱 孔教

玉池史先生 諱 孟麟

慎所丁先生 諱 元薦

少墟馮先生 諱 從吾

筠塘陳先生 諱 幼學

淇澳孫先生 諱 慎行

彙旃高先生 諱 世泰

儉齋王先生 諱 永圖 宜興人

弦所張先生 諱 夢時 無錫人

西溪繆先生 諱 昌期 江陰人

湛持文先生 諱 震孟 長洲人

觀華吳先生 諱 桂森 無錫人

鳳超華先生 諱 允誠 無錫人

素修馬先生 諱 世奇 無錫人

霞舟吳先生 諱 鍾巒 武進人

庸菴顧先生 諱 樞 無錫人

大音秦先生 諱 鏞 無錫人

南阜鄒先生 諱 元標 吉水人

振衡余先生 諱 玉節 大冶人

燕超華先生 諱 允謀 無錫人

大洪楊先生 諱 山璉 應山人

廓園魏先生 諱 大中 嘉善人

石齋黃先生 諱 道周 漳州人

經畬鄒先生 諱 期楨 無錫人

狷菴金先生 諱 武進 武進人

寶慈成先生 諱 樂安 樂安人

蘇門孫先生 諱 奇逢 嘉善人

幾亭陳先生 諱 龍正 嘉善人

景素于先生 諱 孔兼 金壇人

補祀



復祀

|                                |                                |
|--------------------------------|--------------------------------|
| 徽山虞先生<br><small>諱薦發丹陽人</small> | 忠餘鄒先生<br><small>諱期相無錫人</small> |
| 水菴秦先生<br><small>諱爾載無錫人</small> | 並漁陳先生<br><small>諱正卿無錫人</small> |
| 仁寰宿先生<br><small>諱夢鯉無錫人</small> | 訥菴華先生<br><small>諱貞元無錫人</small> |
| 仲馭周先生<br><small>諱鑣無錫人</small>  | 日齋黃先生<br><small>諱錫廣無錫人</small> |
| 太巖張先生<br><small>諱雲鸞無錫人</small> | 蒙吉刁先生<br><small>諱祁州包人</small>  |
| 北海孫先生<br><small>諱承澤大興人</small> | 子眾陳先生<br><small>諱嘉善人</small>   |
| 曠如施先生<br><small>諱元徵無錫人</small> | 澹緣秦先生<br><small>諱重泰無錫人</small> |
| 孫菴暉先生<br><small>諱日初武進人</small> | 震西龔先生<br><small>諱廷歷武進人</small> |
| 佩之嚴先生<br><small>諱錫人</small>    |                                |

配位緣起

宋喻玉泉先生 龜山門人

宋尤遂初先生 玉泉門人

宋李小山先生 遂初門人

宋蔣實齋先生 遂初門人

右喻尤李蔣四先生由龜山一脉遞傳故以之配享蓋元儒虞薦發所定而邑人稱為五賢者也

宋羅豫章先生 龜山門人

宋胡德輝先生 龜山門人

明邵二泉先生

右羅胡兩先生係萬曆甲辰三十二年顧涇陽先生重建道南祠時所補祀復增入邵二泉合前喻尤李蔣為七先生



明顧涇陽先生

明顧涇凡先生

明錢啟新先生

明薛以身先生

明安我素先生

明劉本孺先生

右六先生係天啓六年丙寅二月高景逸先生將殉止水而躬進者有告祠文

明高景逸先生

明葉開適先生

明陳筠塘先生

明許靜餘先生

明吳素衣先生

明鄒經畬先生

右六先生崇禎年間所進

明張弦所先生

係崇禎年間所進

明馬素修先生

明華鳳超先生

右兩先生係順治六年高世泰等公送入祠

明周仲馭先生

係順治九年高世泰等公送入祠

明秦水菴先生

係順治十二年高世寧等公送入祠



明宿仁寰先生

明陳幾亭先生

明華訥菴先生

右三先生係順治十三年高世泰等公送入祠

明鄒忠餘先生

係順治

明陳並漁先生

係順治十六年

等具呈邑令黃公從祀

明黃日齋先生

係順治十七年鮑鳳來等具呈邑令黃公從祀

明張泰巖先生

係順治十八年鄧胤祺等具呈邑令黃公從祀

明孫淇澳先生

係

明惲遜菴先生

係

明刁蒙吉先生

係康熙九年高世泰等具呈邑令吳公從祀

宋虞薇山先生

係康熙十一年高世泰等置主補祀

明秦澹綠先生

係康熙十年

等具呈邑令吳公從祀

明史玉池先生

係康熙十二年高世泰等具呈邑令吳公從祀



明嚴佩之先生

係康熙十二年

等具呈邑令吳公從祀

明施曠如先生

係康熙十三年龔廷歷等具呈儒學

公從祀

國朝孫北海先生

係康熙十五年高世泰龔廷歷高芷生等具呈邑令吳公從祀

國朝龔震西先生

係康熙十七年王仁液等具呈邑令韓公從祀

明成寶慈先生

國朝陳子衆先生

右兩先生係康熙二十年張光庭高苳生高芷生等呈邑令會

公從祀

明余振衡先生

係康熙二十一年高苳生高芷生等具呈邑令曾公從祀

明周懷魯先生

明李元冲先生

明馮少墟先生

明丁慎所先生

明歐陽空諸先生

明劉念臺先生

明高彙旃先生

明王儉齋先生

明華燕超先生

明楊大洪先生



明繆西溪先生

明魏廓園先生

明文湛持先生

明黃石齋先生

明金狷菴先生

明吳霞舟先生

明孫蘇門先生

明顧庸菴先生

明秦大音先生

係康熙

十年

年孫秉禾等具呈邑令吳公從祀

明鄒南臯先生

明于景素先生

明賀亨陽先生

明熊祈公先生

明汪鶴山先生

明胡慎三先生

明蔡雲怡先生

公從祀

右兩先生係康熙二十五年施璜等具呈邑令徐公詳道憲劉

學方公邑令徐公詳道憲劉公學憲趙公從祀

右兩先生係康熙二十三年高莒生錢肅澗高芷生等具呈儒

學方公邑令徐公詳道憲劉公學憲趙公從祀

明蔡雲怡先生

公從祀

東林書院志



國朝王敬哉先生

右兩先生係康熙二十五年高芷生錢肅澗等具呈邑令徐公詳道憲劉公從祀

國朝湯潛菴先生

係康熙二十六年孫繹武等具呈邑令徐公通詳各憲從祀

明龔佩潛先生

係康熙二十七年門人王列星等具呈邑令詳府轉詳學憲李公批行從祀

明王軒籙先生

係康熙三十三年許之漸高莒生高芷生等具呈撫憲宋公學憲許公從祀

明周蓼洲先生

國朝吳徽仲先生

國朝施虹玉先生

右三先生係康熙五十二年楊慶徵高芷生高桂等具呈邑令涂公詳撫憲儀封張公批允入祠

國朝熊敬修先生

國朝張菰川先生

右兩先生係康熙五十二年高芷生秦源寬高隆等具呈邑令涂公詳撫憲儀封張公批允入祠

國朝陸稼書先生

國朝汪默菴先生

右兩先生係康熙五十二年高芷生高大酉高增等具呈邑令涂公詳撫憲儀封張公批允入祠



明陳中湛先生

係康熙五十六年周朝銓吳雲棟高增等具呈學憲林公批允入祠

國朝宋牧仲先生

國朝許時菴先生

右兩先生係康熙六十年祝昇平高桂高隆等具呈本學李公詳請學憲鄭公批允入祠

國朝張孝先先生

係雍正三年王雲錦高桂華希閔高隆顧滂等具呈撫憲張公批允入祠

明姜同節先生

國朝高紫超先生

右兩先生係雍正七年孫襄仁等具呈邑令王公詳請學憲鄧公批允入祠



添設牲牢緣起

江南常州府金匱縣爲顓詳捐設牲牢永光南道俎豆事案據紳士秦源寬杜詔王澍高崧華希閔高隆許獻高躍龍秦伯龍高廷珍鄒鳳城高文長等公呈前事內稱金邑東林書院有道南祠祀宋楊龜山先生及羅豫章以下計先賢共八十有八人生雖異代此心此理皆同道出一源其人其品無二有明萬曆之季顧高繼起大振儒宗迄今隆盛之朝熊許諸公有功講席一堂共祀千古爲昭但神祠三間正中一龕係奉楊龜山先生神位旁列四龕係宋元明以至本朝諸賢從祀之位每逢春秋二丁行祭止于龜山龕前例備猪羊一副而從祀如羅豫章以下四龕向來祭品闕如幸遇師臺學道愛人景行先哲每于文廟行香之後瞻謁無虛更集諸生文課其中薰陶有藉本年二月初十日親行致祭于從




祀四龕之前特捐設猪羊四副將辦香之益燕亦血食之愈隆大  
愜人情堪為定例伏懇備文申 憲載之祀典永垂無窮則配食  
益崇其儀諸賢之勝蟹倍著牲牢不缺于物道南之俎豆彌光將  
系學之薪傳炳于星日而先賢之道統浩若江河矣等情具呈前  
來據此當經具詳 各憲在案今奉 署督部院尹 批開仰蘇  
州布政司查明飭遵繳又奉 署撫部院喬 批開仰布政司查  
明議詳核奪仍候 督部院 批示繳又奉 布政使司白 批開  
據詳道南祠旁祀諸賢捐備牲牢致祭足徵留心祀事既據通詳  
仰候 各部院批示具報繳又奉 按察司刁 批開道南祠正  
中一龕向備猪羊崇祀旁列四龕諸賢岳峙昌明  
聖學均有功于世道人心羽翼龜山感宗主于分殊理一此誠先  
後同揆所宜薦歆一體者也今春秋二祀祭品闕如該縣親行致

祭於從祀四龕之前捐設辦香牲醴脩所未脩祀典從新諸紳士  
崇賢念切思隆俎豆之光而該縣重道情殷大煥蒸嘗之典詢稱  
盛舉允協輿情據詳仰常州府轉飭悉如所請永著為例仍候  
各院憲批示繳又奉 本府正堂魏 批開先賢從祀例設祭品  
或編款不敷添脩以光祀典誠當永遠照行仍候 各憲批示繳  
各等因批行到縣奉此該卑署縣從祀先賢祀典宜脩凡遇祭時  
捐設牲牢應請永為定例以昭祀典遵奉批飭議詳合行詳覆仰  
祈 憲臺俯賜轉詳為此卑署縣合行具由另脩書冊謹申伏乞  
照詳施行須至申者雍正十年六月初十日知縣胡公 名慎  
署江南常州府正堂李 為籲詳捐設牲牢等事七月十五日蒙  
布政司白 憲牌內開奉 署撫都院喬 批本司呈詳該府  
詳覆金匱縣道南祠旁祀諸公捐設牲牢一體致祭詳請永為定



例緣由蒙批如詳飭遵繳等因到司奉此合行轉飭仰府即便轉  
 飭遵照毋違等因到府蒙此合就轉行爲此仰縣官吏查照來文  
 即便遵照毋違須至牌者雍正十年七月二十三日知府李公  
 振



東林書院志卷之十三 終

文化己巳

庚子三月



